

東
華
續
錄

東華續錄

咸豐五十六

臣王先謙敬編

臣陶澐宣恭校

咸豐六年丙辰春正月己未朔諭內閣奕諒著加恩賞還惇郡王
○庚申諭內閣陸元烺奏水陸兵勇收復樟樹鎮一摺逆匪由臨
江分股竄擾樟樹鎮築壘搭橋踞河抗拒經副將周鳳山督飭都
司滕國獻參將阿達春等分路進攻該逆傾巢出拒官軍奮力鏖
戰先斃六七百人賊卽潰敗我軍火器齊發立毀賊壘五座焚溺
無數並將賊船二十餘隻燒毀惟時河南候補知府劉于濤督率
水師傍岸夾擊該逆棄壘逃竄賊營礮臺悉被踏毀其經周鳳山
勦敗之賊正由浮橋竄渡劉于濤與水師營官賀虎臣開礮轟擊
砍斷浮橋直衝上游焚毀賊船及被擄民船一百十餘號當將樟

樹鎮收復見在周鳳山由新淦一路渡河進剿遊擊遮克敦布由奉新一路進剿著曾國藩陸元烺督飭各員迅將旁竄各匪剿洗以圖克復瑞州臨江無稍延緩見在新淦奉新均有匪蹤闖入雖因兵力較單究屬防堵不力署新淦縣知縣李作士奉新縣知縣寶煦俱著革職戴罪隨營以觀後效○辛酉諭內閣縣勦奏多爾濟那木凱接班遲誤一摺向來王大臣等禁城內進班遲誤並出班之人不待交替散歸者例禁甚嚴若有別項差使勢難兼顧並非藉詞推諉者則出班之人通融少待雖例無明文而亦不外乎情理縣勦前因國瑞圓明園接班稍遲具摺奏聞經朕查明國瑞係有隨從差使故未予處分並非從寬免究茲多爾濟那木凱於元旦亦有隨從差使接班稍遲並未曠誤縣勦既知多爾濟那木凱並非無故遲延何得復行參奏顯因是日不能及早出班特以

申明舊例爲詞假公濟私實屬非是且據奏請或仍遵舊例或另定新章等語尤屬妄言負氣絲勳著交宗人府議處嗣後輪應進班之王大臣等如無別項差使而逾遲時刻或藉端推諉曠誤不到者仍著出班之人據實參奏若如國瑞多爾濟那木凱之事出有因人所共知者不得挾私妄劾以昭平允○諭向榮奏蕪湖水陸截剿疊獲勝仗一摺逆賊負固蕪湖節經官軍圍蹙副將李德麟探聞江北神塘河口內賊匪數千夥併安慶竄下賊船在泥汊河荻港一帶窺伺接應十一月二十二日李德麟帶領紅單船折赴神塘河進剿賊眾蜂擁拒敵經紅單船往來衝盪轟沈賊船三十餘隻生擒僞檢點趙元發等八名奪船八隻餘賊遁入河口總兵吳全美各船在下游同時將裕溪口接濟賊船擊沈截剿偷渡賊划十二月初九日賊復自無爲州糾合上游賊船數百隻竄應

神塘河直偪荻港李德麟兩會鄧紹良吳全美分派兵船合力助
剿李德麟督船先到奮勇轟擊立毀大小賊船數十隻焚溺賊匪
無算生擒僞將軍王濟興等奪獲礮械多件乘勝跟剿十二日駛
至劉家渡江面外委劉得清乘駕快蟹船首先衝入賊隊把總鄭
吉星劉裕安等均各併力攻擊計共奪船三十隻軍器二百餘件
賊眾拌命潰逃其應援石壘之賊自陶陽鋪等處來犯均被鄧紹
良督勇擊回復將范羅山守垛賊匪擊倒該逆見勢不支自將陶
陽鋪等處賊壘焚棄而竄此次擊敗賊援逆黨已成孤立著向榮
卽飭各路將弁乘此聲威迅速掃蕩以清江面○諭軍機大臣等
向榮奏蕪湖水陸獲勝情形一摺據稱旗羅山等處賊匪焚壘回
竄東梁山已調魯港老鴉山兵勇協紮黃池杜其內竄之路該處
直接高淳東壩久爲逆匪窺伺稍有鬆懈內犯堪虞向榮所派兵

勇是否足敷堵截此時蕪湖陸賊雖棄壘潛竄鄧紹良一軍仍應嚴扼上游恐不能分兵返顧向榮前奏揀派精銳一軍以備緩急如黃池有警卽令總兵明安泰統帶由高滄一帶攔剿布置尙屬周妥仍當確探賊蹤盡力堵截不可令其竄入腹地亦不可因該逆回竄遽撤上游精銳兵勇致墮該逆牽綴之計至金陵逆匪糾合上游各路黨與分屯各門意圖援應鎮江據向榮前奏已飭德安帶江鎮得力兵勇駐紮東陽鎮斷其往來誠恐賊眾我寡專事扼截未能得力著與吉爾杭阿妥爲籌商總以誘賊出巢就地剿殺使之不敢旁竄方能杜其窺伺詭謀前據托明阿奏探聞金陵首逆定於十二月十五以後二十五以前水陸齊進下援瓜鎮雖其日期不可憑信而急圖下竄之意則與向榮見奏情形符合向榮吉爾杭阿務當加意防範能乘該逆出援痛加剿洗不特可免

內竄之患亦於克復城池事機更有裨益將此由六百里諭令知之○向榮奏請飭甘肅提督索文赴江皖等省剿匪得旨索文人尙可用意頗勇往前經琦善奏調因甘省乏人未允見在甘省兵少餉缺各鎮率皆署任正資彈壓不能令其遠出也○壬戌諭軍機大臣等英桂奏擒匪竄回老巢亟須添兵進剿一摺擒匪張落刑等雖經柘城等縣團勇擊退全數敗回雉河集而擊獲奸細有欲向會亭馬廠等處招集夥黨會合大股等語自應乘各匪未出之先厚集兵力直搗賊巢不得因豫境暫時安謐專事防堵致令蔓延武隆額所稱調取壽春固原河州等兵均不能來河南所派兵勇僅止數千自嫌單薄惟安徽省前有鄭魁士原帶兵一千五百名已諭令和春等另委大員統帶此外有容照興慶所帶馬步隊兵及諭托明阿等酌派之吉林兵並令官文於畱駐德安馬隊

中量撥數百名又有和春等前派之戴世熙所帶兗州中正各兵
勇龔耀倫武全之徐州潁州兩處兵各五百名爲數已屬不少英
桂見在督辦三省剿匪事宜權有專歸責無旁貸著卽遵旨嚴催
各路兵勇前赴雉河集會剿儻有逗畱畏憚情事卽將帶兵各員
從嚴參辦以肅軍令毋令遷延致有貽誤軍行糧餉一面飭令藩
司籌款接濟將此由六百里加緊諭令知之○江南河道總督楊
以增卒于祭葬卹廕如軍營病故例○以庚長爲江南河道總督
未到任前以漕運總督邵燦兼署並督辦防堵事宜以錢忻和爲
直隸布政使趙德輒爲江蘇按察使

由常鎮通海道遷

○甲子諭軍機大

臣等前因武隆額督剿擒匪毫無把握已降旨專交英桂督辦所
有三省會剿官兵悉歸該撫節制本日據英桂奏已飛飭嚴提慶
興朱連泰等卽日管帶兵勇及早會合進攻賊巢又據和春福濟

奏武隆額將亳州官兵調赴永城自係歸德未經解圍以前之事
英桂所奏請飭和春等續派官兵由蒙亳進徧賊巢又係未接皖
省移文尙不知鄭魁士已赴亳州塔思哈已於十二月初六日由
霍山啟程之事今豫省已無匪蹤捻眾業經回竄自以潁亳一帶
爲喫重所有武全管帶之潁州兵徐曉峰管帶之中正勇卽著由
亳州一路進攻朱連泰管帶之兗州徐州兵卽著由永城折回四
面會合力破賊巢鄭魁士旣經前往該處卽著督率諸軍迅圖攻
剿仍歸英桂節制如皖省勦辦緊急該匪或仍竄豫境鄭魁士卽
應馳往豫省協剿總宜賊在何處兵到何處不得稍分畛域但知
自固藩籬至英桂旣督辦三省勦匪事宜卽非河南一省之前
此諭令馳赴歸德原因賊在歸德之故今旣已退回安徽境內該
撫卽應帶兵前往交界處所扼要駐紮一面撥兵前赴會剿若如

所奏俟兵勇到齊再赴歸德未免過於迂緩容照馬隊近在宿州
與其調往豫境何如飭赴潁毫而該撫移營就兵較爲近便其續
調之信陽防堵兵五百名保安所帶山東兵五百名該撫已令先
赴歸德卽著催令由歸德前進會合皖兵其河北各兵並滑縣壯
勇儻一時未能齊集該撫止可先行出省將武隆額見帶之兵調
集進剿匪蹤烏合紛竄無定總以迅速爲貴庶不至養成巨患至
吉林黑龍江馬隊調出已多且恐緩不濟急福魁甫經回任未能
再行調派其前調揚州軍營馬隊本日據托明阿奏稱已派吉林
馬隊五百名交待衛伊興額協領德昌管帶由浦口六合兼程前
進取道滁州馳往歸德著英桂卽行催提徑赴潁毫一帶會同鄭
魁士合力協剿毋庸前赴歸德其塔思哈一軍並著和春等飛催
赴毫歸英桂調遣毋任稍延江南境內防禦亦關緊要署總兵傅

振邦既已到任興慶即可帶兵出境探明賊蹤赴皖會剿其本境防堵事宜卽由傅振邦籌辦將此由六百里各諭令知之○乙丑諭內閣內務府奏訊明犯事太監大概供詞一摺國子監祭酒彥昌張家口理事同知恆俊聽信太監丁得祿展轉請託薦用家丁殊屬有干例禁彥昌恆俊均著降一級調用○諭石景芬奏駐紮青山防堵並攻剿賊卡獲勝一摺賊匪在金柱關搭造浮橋窺掘溪塹意圖窺伺甯國府城經石景芬移營青山派兵前往迎剿十二月二十三日賊由龍山橋內犯我軍槍礮齊發斃賊三十餘人賊眾退入卡內當經我軍火器焚燒外卡逆賊挂帆逃逸復被官軍焚燬賊船五隻浮橋一座逆匪焚溺甚多其閉卡死守之賊亦經把總郭桂林等拔樁先登各勇奮力環攻斃賊三百餘人賊勢已蹙金柱關爲蕪湖金陵往來要道此次迎剿獲勝誓向榮卽飭

該革員隨同鄧紹良等認真堵剿迅圖克復以贖前愆○諭軍機大臣等前因何桂清奏參道員石景芬私心自逞有意邀功當經降旨將該員革職本日據該革員奏報紮營青山及進剿金柱關賊匪情形尙能扼要布置已明降諭旨將該革員交向榮差委矣見值軍務需人金柱關既爲金陵蕪湖賊匪往來要道黃池一帶防兵甚單著向榮卽飭該革員隨同鄧紹良認真堵剿以杜該逆內竄之路仍著隨時察看如該革員仍復有意矜張不知感奮卽行奏明撤退毋稍遷就儻實能奮勉立功准其據實保奏將此由五百里諭知向榮並諭鄧紹良知之○予安徽陣亡縣丞杜時升祭葬世職○丙寅以江蘇紳團擊匪出力賞在籍左副都御史程庭桂二品頂帶○丁卯諭內閣前因戶部尙書柏葰謝恩摺內有奉硃筆字樣恐有人寄信通知諭令該尙書明白回奏茲據奏稱

謝恩摺件係接奉吏部來文始行拜發實無通信之人因繙譯摺
藁時未向部文校對以致字樣不符等語柏後身任大員諒不敢
捏詞掩飾惟於拜發摺件並不細心覈對致增疑竇實屬疏忽著
交部議處○諭蔣蔚遠等奏匪徒竄陷城汛旋即收復一摺貴州
教匪徐廷杰等於上年十一月竄撲銅仁府屬之正大營署分防
縣丞趙世欽署守備宋興邦等帶兵出城抵禦因眾寡不敵被匪
擁入宋興邦等密約城內兵民乘夜放火開門內外夾攻斃匪多
名該匪卽行奔逃其官思南分撲印江之賊經署印江縣知縣何
維炳率勇迎殺十數名又有另股匪徒撲來眾寡不敵賊竄入城
何維炳帶領練勇殺死紅巾騎馬偽將軍一人夥賊二百餘人復
密派團民入城內應砍開南門遂將印江縣城收復搜殺竄匿餘
匪百數十名署銅仁協守備宋興邦署印江縣事候補府經歷何

維斡於所守城汛被賊竄入咎有應得惟數日內卽能設法收復
尙知愧奮該員等失守處分均著免其置議署正大營分防縣丞
試用從九品趙世欽被賊衝散著蔣爵遠查明該員下落如有逃
避情事卽著從嚴參辦○諭軍機大臣等蔣爵遠奏銅仁匪徒連
陷府縣請飭催川楚兩省官兵會剿一摺前已有旨諭令黃宗漢
飭令蔣玉龍傅崑等帶兵相機進擣與黔兵協力夾擊並令萬福
扼守川省門戶爲蔣玉龍等後援又諭駱秉章酌量情形令文安
督兵由楚入黔藉資堵剿茲據蔣爵遠奏稱該匪等奔竄思南石
阡後又有窺伺思州之信賊氛猖獗急須催兵會剿自係實在情
形見在傅崑已經到黔其蔣玉龍之兵因秀山一帶松桃餘匪未
盡以致赴黔稍遲文安所統各兵亦恐因道途不靖晃沅等處阻
梗未能出境業經屢次降旨飭催著蔣爵遠探明川楚官兵見抵

何處派員迎提以資協擊必先就見有兵力分撥進剿毋得專待客兵至思南石阡是否旋失旋復並著蔣霽遠確查具奏思州被擾已據文安奏報該撫亦探有匪徒竄往應卽嚴飭帶兵員弁趕緊迎剿毋令蔓延將此由六百里諭令知之○于貴州殉難參將烏爾滾珠等祭葬世職○己巳曾國藩奏副將周鳳山會同水師劉于濬等進規樟樹鎮連獲大捷十二月初四日卽將該鎮克復初八日周鳳山馳抵灌溪聞新淦縣城有千餘賊盤踞該縣爲通撫州府及省城要道若舍此徑剿臨江恐賊由東岸竄擾蔓延撫建必須先克新淦乃無後路牽制之虞遂於初九日約同水師星夜進攻該逆聞風懼怯紛紛竄渡臨江各營跟蹤追擊斃賊多名其登岸之賊狂奔遠遁我軍入城安撫收復新淦縣城查僞易王石達開占踞臨江府匪黨分布瑞州新昌新淦奉新及袁吉各屬

又以精銳屯集於樟樹鎮扼省城之咽喉逆計實爲兇狡周鳳山
初統此軍先破樟鎮次收新淦仰仗 天威軍聲已振籲懇 皇
上天恩容 臣擇尤彙保以示鼓勵 上諭內閣上年十二月初四

日官軍克復樟樹鎮業經陸元烺奏報茲據曾國藩奏副將周鳳
山於克復該鎮後聞新淦縣城有賊盤踞約同水師進攻當將縣
城收復此次周鳳山與在籍南河候補知府劉于澍督同水陸各
軍疊獲勝仗收復樟樹鎮及新淦縣城辦理尙屬得手所有在事
出力文武員弁兵勇著曾國藩擇尤保奏候朕施恩○庚午諭內
閣勞崇光奏請飭催實任揀發及大挑各員迅速赴粵並查明改
捐員數補行揀發一摺廣西省部選及揀發人員到省者甚屬寥
寥該省軍務未竣差委需人豈容任意遷延著吏部查明單開各
員催令迅速依限赴粵如有無故逗畱者卽照例參處其上屆揀

發廣西各員著查明改捐指省員數在於候選人員內另行如數
照例揀選帶領引見候旨發往至所稱銓選揀發後改捐歸選指
省人員請飭酌議章程定以限制之處並著該部覈議具奏單併
發尋奏用兵各省揀發等員不准捐離省及改捐他省月選各員
不准改捐降捐捐升者到省後方准辦理從之○辛未祈穀於

上帝 御製書事示廷臣曰予蒙 天恩承 考命臨御天下六

年於茲四海無一日安靜萬姓罹兵燹之災返躬自問 天恩未
報 祖考之恩未報若稍自暇逸是誠何心哉予不敢亦不忍也
每逢親詣 郊壇無不心增愧慙今年新正幸圖敬循 成憲次
日卽恭值 皇考忌辰地猶斯地 言猶在耳興念及此真堪一
痛哭也斯夕常思何以使兵戢民安仰答 天 祖之恩惟有永
勵斯志倍加敬勤不願徒託空言務期躬行實踐爾諸臣或曾磨

顧命或簡在賢良既爲國之大臣當思共濟時艱即使天下旣安更妨恬嬉之漸書曰慎終如始我君臣其共勉之○諭內閣英桂奏請飭撥馬匹以資剿匪等語著上駟院於牧放蒙古捐輸馬匹內挑選膂壯馬五百匹著管理火器營王大臣卽派該營章京分起管帶前往河南交英桂軍營聽候撥用沿途經過地方著順天府直隸總督派員接遞護送妥爲照料○王申諭內閣駱秉章奏官軍剿擊黔匪獲勝並克復廳縣城池一摺貴州苗匪攻撲鎮遠城垣經護辰沅永靖道翟誥派委屯弁梁友芳及苗守備麻學道等各帶兵勇進剿斃匪八十名該逆分路竄犯晃州復分撲沅州府城知府方傳穆與在城文武督率兵民嬰城固守署都司黃文燦率兵親開大礮各城兵勇槍礮齊施斃賊數百名賊遂敗退由大路分竄方傳穆等督兵跟蹤追殺斃賊四百餘名生擒一百

五十餘名其分股賊匪竄入麻陽縣城翟誥卽飭守備張萬書等統帶兵勇分路前進擊斬賊首七百餘級斃水溺斃者不計其數賊敗入城張萬書率兵入城生擒賊目二名賊黨三十餘名斬首三百七十餘級卽將縣城克復其晃州廳亦經地方文武團練自行收復署綏靖鎮總兵榮山等督率剿辦永綏廳股匪兵練奮勇下城殺賊生擒執旗賊二名斃賊二百餘名同知長惠選派紳士出示曉諭誘擒賊首各苗寨紛紛投誠捆獻匪黨黔省苗匪竄擾湖南晃州等處經地方員弁兵勇合力進攻收復城池辦理甚爲得手所有在事文武兵勇著駱秉章擇其尤爲出力者酌量保奏○諭駱秉章奏粵賊竄踞郴州官軍會剿收復州城並窮追疊勝陣斬首逆郴桂一律肅清一摺前據駱秉章奏湖南桂陽茶陵兩城同日克復之後茶陵之賊奔竄江西桂陽之賊奔回郴州經駱

秉章飭令選用道王鑫等兵勇會剿上年十月間在瓦窯坪等處連次獲勝殺賊千數百名及數百餘名不等節次移營進逼郴城大舉環攻賊之出城撲營及分投掠食者均經擊殺殆盡至十月二十六日王鑫率同已革參將李輔朝江西補用知府劉長佑及署知州戚天保等兵團分路進攻齊偏州城該匪紛紛驚竄各路跟蹤擊殺賊三千餘人當將州城收復餘賊竄逃各路並經我軍追剿及郴桂各屬團練截殺賊匪一二千名或數百十名搜戮殆盡地方一律肅清逆首何祿自郴城破後帶傷逃竄經官軍擒斬當將首級及生擒賊目朱顯輝等一併解省凌遲梟示所辦尙爲妥速出力官紳及陣亡紳勇著查明奏請獎卹其餘失事文武一併查參○諭軍機大臣等駱秉章奏湖南軍餉不支請仍飭川省籌銀迅解等語據稱該省用兵日久羅掘已空積欠各路口糧已

十餘萬兩見因江西情形喫緊遵旨派兵援剿餉需無可再籌必
得將前請解撥川餉十二萬兩仍飭川督籌解所奏自係實情見
在湖南剿匪屢獲大勝郴桂一帶一律肅清該撫卽分兵往援江
西實能不分畛域但兵餉支絀鄰省中惟四川爲完善之區惟近
來協撥已多情形亦非充裕著黃宗漢悉心籌畫或分起撥解以
資接濟不得以無款可籌致有貽誤將此由六百里諭令知之○
諭駱秉章奏派員帶兵會剿黔匪等語據稱鎮遠鎮總兵文安足
疾未愈不宜鞍馬擬派守備田宗蕃熊興柏張萬壽等督率兵勇
由大興場邊界追剿銅仁竄匪乘勝躡蹤前進卽著該撫飭令該
守備趕緊剿辦會合貴州官兵以期痛殲匪類而欲綏靖黔邊尤
必先清楚境永綏鳳凰兩廳屬尙有苗民未盡帖服亦應迅速妥
辦庶無後顧之慮其楚黔交界地方仍飭文安及護道翟誥嚴扼

門戶毋令匪蹤窺伺將此由五百里諭令知之○予湖南陣亡知縣魏承祝祭葬世職○甲戌諭軍機大臣等本日據吉爾杭阿奏南北會剿獲勝並上游大股逆匪圖援鎮江見在堵剿情形一摺吉爾杭阿督兵進攻寶蓋山賊壘獲勝瞭見北岸礮火絡繹知托明阿等亦同時進剿惟據奏金陵首逆調集上游賊眾將由南岸竄援鎮江如被官兵要擊欲由北岸至瓜州渡江以圖一逞必須於江面扼要截剿不可令其南北兩岸往來自如著托明阿向榮嚴飭陳國泰調集師船於沙密州一帶防剿杜其北竄之路至金陵賊黨竄窺棲霞石埠橋等處鎮江之賊又欲潰圍而出是該逆以全力回救鎮江且有旁竄內犯之慮此次殺賊雖以千計而賊援未退勢甚猖狂余萬清馳赴東陽虎嵩林馳赴高資所帶兵勇是否足資堵剿著向榮吉爾杭阿飭令帶兵各員迅將棲霞等處

之賊併力勦擊毋令下援鎮城並竄往他處致勦辦又形棘手托
明阿仍當約會吉爾杭阿於南北兩岸同時進攻使逆匪不暇兼
顧僅能先克鎮江則水師紮營金山攔截江面瓜州接濟必可斷
絕而金陵賊勢亦孤攻勦自易爲力該大臣等務須南北通籌水
陸並舉毋得日事耽延致有貽誤將此由六百里各諭令知之○
乙亥向榮奏金陵逆賊自上年十一月連次大創而其竄擾鎮江
之心不死復糾集黨與紛紛竄回十二月十九日接各路報探有
賊數萬由上游陸續竄至聞係蕪湖兩岸外援及兩梁山金柱關
與江北和含一帶並廬州三河之賊陸續歸併金陵分布各城刻
日大股出巢衝竄一由神策門至仙鶴門鈔拒我兵一由觀音門
沿江至棲霞一帶直走鎮江一由南路秣陵以圖內犯並埋伏太
平各門附近俟我兵分調各路卽來圍撲大營又有大小賊船在

夾江窺伺下竄當與晉江甯將軍福興籌商揀派馬步隊伍交總兵張國樑副將秦如虎統帶分起馳往仙鶴門迎剿飛檄秣陵東陽兩軍嚴加堵截咨照怡良吉爾杭阿飭屬一體防堵調兵丹陽固守要衝並由鎮營選派一軍馳赴東陽一帶會剿分飭堵泊觀音門師艇及六合縣水勇截擊下竄賊船二十二日張國樑秦如虎兩軍馳至仙鶴門擊賊大勝直追至觀音門聞有賊兩大股已沿江竄赴棲霞石埠橋一帶卽回軍馳往截剿秦如虎分兵繞往東陽會同德安張國樑一齊進攻該逆已於棲霞石埠橋之間築壘踞守張國樑督兵衝進極力勦洗德安秦如虎兩軍已到石埠橋之東與賊接仗羣逆敗退回巢城中復出賊數千由龍脖子來窺我楚粵兩營被擊敗退我兵將賊偏入明陵斬殺極多逆股復至南路元山一帶亦經明安泰擊回板橋斃賊無數伏查該逆四

出衝突牽掣我兵大營存兵有限分撥不敷因查蕪湖外援之賊業已竄回可以移緩就急當檄鄧紹良由蕪營抽調兵勇二千六百名前來助剿卽飭乘此機會協同舟師迅圖攻克石壘掃蕩逆氛並就近在秣陵撥勇先行馳往東陽責令德安秦如虎迅籌攻剿鎮營派來兵勇已由余萬清統帶馳抵龍潭探有賊匪數千由沿江洲路下竄秦如虎余萬清由龍潭趕赴下蜀街攔截該逆卽潛遁回巢有欲步步爲壘直逼鎮江之語龍潭上距東陽五里內通句容丹陽其下十五里爲下蜀街乃洲地前竄要隘當飭秦如虎至龍潭築營催趙蕪湖調來兵勇趕往屯紮余萬清一軍紮營下蜀街虎嵩林之兵由高資移併堵守本年正月初三日探有賊匪數千由龍潭山後下竄秦如虎馳往東路兜截將賊股悉力截回初五日見有賊大股竄下卽與李定太會兵渡河截剿逆眾大

敗潰入三汊河其前股下竄之賊經余萬清虎嵩林等擊回該逆
退踞李家橋地面秦如虎李定太等馳赴下蜀街協堵乘勝攻剿
三汊河而李家橋賊股復由趙家橋衝竄余萬清等分路追截斬
擊無數餘賊敗回李家橋而去此半月以來連次堵剿之實在情
形也此股竄匪勢眾且悍我兵經旬勦截雖未能大挫賊鋒而自
東陽以至龍潭下蜀街連營三十餘里該逆既難飛越內犯亦無
從竄擾鎮江所有沿江河汊亦已由吉爾杭阿調撥下游戰船分
泊高資鮎魚套一帶截賊出江之路臣責成余萬清等激勵各營
迅掃羣醜張國樑設法截賊後路明安泰嚴堵秣陵密防南面咨
商督撫添兵駐守丹陽以防內犯見在蕪湖情形較緩飛檄總兵
吳全美抽帶紅單船二十隻由梁山金柱關節節掃蕩直徧江南
大勝關一帶以清江面而分賊勢其餘蕪湖各船卽令交副將李

德麟統領分扼上游會剿石壘一俟蕪湖得手併下合圍金陵剿辦更有把握 上諭軍機大臣等前據吉爾杭阿奏上游賊黨圖援鎮江當經諭令向榮托明阿等將棲霞等處之賊速籌會剿杜其下援並毋令旁竄內犯本日據向榮奏金陵逆賊糾合上游黨與眾至數萬分路竄擾經向榮截剿獲勝隨咨商怡良吉爾杭阿於丹陽地方添兵防堵並令余萬清扼守下蜀街調派鄧紹良移兵至棲霞一帶吳全美紅單船赴大勝關分投剿擊東陽高資等處俱已添撥兵勇堵截布置均合機宜該逆圖援鎮江糾眾肆擾非大加懲創不足以杜其奸謀見在金陵東路兵勇雲集除旁竄內犯各要隘必應嚴堵外仍應亟籌進剿以殲羣醜著向榮督飭余萬清鄧紹良等務將洲地往來賊匪併力以剿悉數殲除吳全美師船亦准其調赴大勝關協力攻剿其沿河港汊並咨令吉爾

杭阿派撥戰船分投堵禦務令水陸各軍聲勢聯絡毋令竄越其
蕪湖賊壘並著飭令李德麟等就見有師船迅速攻剿該大臣前
請續調紅單船已據葉名琛奏報雇得二十七隻派令李明新管
帶於前年十二月初一日自粵開行一俟進江後卽著向榮妥爲
調遣以資助剿將此由六百里諭令知之○論文俊奏江西各屬
賊勢蔓延請飭催兵撥餉一摺江西逆匪久踞瑞州臨江分擾袁
州吉安各屬賊勢猖獗人心惶惑兵單餉絀固係實在情形文俊
甫經到任於該省地勢軍情一時未能周悉見當萬分棘手之時
儻布置稍疏難免貽誤曾國藩自抵江西爲時已久賊情亦所深
悉此時江西匪蹤幾欲蔓延全省旣不能處處調兵又不能顧此
失彼自應擇其最要之處先爲攻剿見在瑞州臨江袁州吉安四
府究竟何處賊情最爲兇悍周鳳山一軍旣由新淦進兵自應急

勦臨江瑞州以殄賊渠周汝筠一軍見阻泰和尤應設法疏通俾得迅抵吉安劉長佑一軍離楚後應由何路進剿方能扼要著曾國藩卽與文俊妥速會商務籌全局不可徒事張皇亦不可專顧一處軍情變幻靡常大勢所關應從何處下手則身在行間者必挈其綱領該侍郎與該撫酌度機宜卽著會同馳奏以慰廑念至德化縣城據文俊奏稱已被溝城賊匪竄踞是否周鳳山全軍遠撤致有疏虞抑或居隆阿等堵剿不力致該逆復有竄出此路一有疏懈關繫長江大局該侍郎等近日如何布置並著速行奏報將此由六百里各諭令知之○論文俊奏賊氛四逼請調兵撥餉一摺見在江西省吉安城圍未解泰和等縣及袁州府又已失守九南吉袁瑞臨並南昌七郡屬邑均被竄擾亟須厚集兵力痛加剿洗方能補救大局昨據駱秉章奏郴桂一帶肅清江西軍情危

急已飭令劉長佑帶兵由醴陵馳赴江西計該員此時當已由省啟程著飭駱秉章飭令迅赴袁州一帶相機進剿所帶兵勇總宜多爲添調合成勁旅毋令賊眾我寡難於制勝至該省數郡蹂躪餉需久匱自屬異常緊迫所有浙省未解部撥協濟江西餉銀十二萬兩廣東省應解還江西墊撥救援韶關餉銀七萬三千餘兩著葉名琛柏貴何桂清仍遵前旨如數籌撥委員迅解江西俾濟急需毋稍延緩將此由六百里各諭令知之○諭歸德捻匪回竄皖境賊巢英桂業已出省調集各路兵勇探明賊蹤扼要兜剿本日據容照奏捻首張落刑及另股捻匪夏白任乾等於正月初八日聚撲宿州經參將塔思哈等出城奮擊賊匪敗退又稱十七日匪眾七八萬全來偪城兵力甚單嬰城固守勢甚危險等語容照帶兵未能得力前已有旨飭回揚州此次奏報是否粉飾張皇掩

其懦怯抑欲助勦立功藉詞畱宿著和春等查探明確如果宿州被賊攻撲情形喫緊卽飭鄭魁士馳赴援勦並著英桂派撥就近帶兵各員馳往合擊該匪不突狼奔飄忽靡定務必隨處確探迅速截剿不可耽延至容照所稱守城出力將弁請准酌保著英桂查明實在情形再行保奏將此由六百里加緊各諭令知之○于江西殉難知縣瑞琳等祭葬世職○丙子諭內閣蔣蔚遠奏擊獲教首逆犯等語貴州正安州等處有青蓮教首劉起得等糾眾滋事抗官拒捕經該地方官督帶兵練於綏陽縣屬之丁木坎等處接仗獲勝殲斃多名並將謀逆首從各犯陸續擊獲就地正法該匪等甫經傳教卽被該地方官次第擊獲所有應得失察處分著加恩寬免出力團首兵勇准其擇尤保奏○諭蔣蔚遠孝順奏勦辦近省匪徒疊獲勝仗一摺貴州貴定等廳州縣匪徒經蔣蔚遠

派候補道張鏌署鎮遠鎮總兵佟攀梅等帶兵勦辦該署總兵等
自上年十二月二十二至十一月初三日於王寨小虎場等處分
投投剿先後斬擒賊匪一千數百人初六日復撲貴定縣城被兵
練內外夾攻斃賊百餘賊即敗退大塘羅斛進偏定番州城佟攀
梅移師往援斃賊七百餘名立解城圍賊復分股竄撲順德關並
威遠汛城其順德關之賊被知縣高廷鏌等擊斃三四百名立即
奔潰威遠汛之賊經署知州杜涿章等擊被數十名孝順自上游
馳至殺賊二三百名復督兵分路進攻官軍奮勇齊進轟斃偽元
帥偽都督及夥匪數百人賊眾棄城而逃城中餘匪投殺淨盡該
匪徒等偏近省垣官兵疊次勦辦均屬得手所有出力員弁兵勇
著蔣爵遠等查明保奏毋許冒濫仍著督飭將弁將平越貴定匪
徒剋日勦洗毋畱餘孽○諭蔣爵遠孝順奏勦辦遵義餘匪連獲

勝仗一摺貴州桐梓等處匪徒在遵義所屬之紅巖頭地方屯住
分出肆擾署桐梓縣知縣劉毅署仁懷縣知縣江炳琳各帶兵練
四路截剿殺賊數百名十月二十八十一月初十等日署遵義府
知府楊書魁遊擊祥福等督兵奪復婁山關追至四杠李家灣等
處合力焚剿連燒賊營五座焚斬匪徒計共八九百人奪獲礮械
無算江炳琳偵知紅巖頭賊巢空虛會同營弁先將附近賊寨焚
毀圍首蔡永清潛在賊巢內應乘亂夾攻匪眾驚潰立將紅巖頭
奪回十二月初四等日祥福疊將四杠賊匪痛剿斬梟偽將軍一
名沿途追殺者不計其數潰匪百餘逃匿巖洞盡被官兵用火薰
斃見在脅從之賊大半解散著蔣霽遠等嚴飭將弁迅速將此股
廓清並將在逃賊首徐子容等擒拏務獲以絕根株○予貴州陣
亡知縣蹇諤等祭葬世職○丁丑張祥河以病免轉匡源爲吏部

左侍郎調沈兆霖爲吏部右侍郎

署工部右侍郎

○戊寅諭內閣葉名琛

柏貴奏勦辦歸善股匪疊獲大勝一摺廣東歸善縣匪徒疊經官軍勦擊仍占踞林村等處肆行滋擾上年七月提督崑壽馳抵該處派令總兵慶寅署惠州府知府海廷琛等統帶兵勇分東西兩路進兵崑壽親督署歸善縣知縣何慶齡等由中路前進八月初一至十四等日各路兵練奮勇攻擊先後將林村鴨石嶺村房坑等處匪巢焚毀十五日以後江水驟漲崑壽督飭該將弁等乘坐船隻進勦先將龍鬱匪巢攻破房屋焚毀繼將馬鞍山胡絲潭道園等處匪巢悉行焚毀崑壽等復舍舟登岸將沙凹匪巢焚毀淨盡二十一二十二等日焚毀冷水坑等處匪巢十六處生擒僞司馬先鋒等多名二十三日焚毀鹿脰紫溪等匪巢五處二十四等日追獲僞西伯侯馮秀及僞總統都督等多名統計一月之間平

毀各鄉匪巢三十餘處殲擒逆匪五千餘名辦理極爲得手所有
在事出力文武紳練著葉名琛等查明保奏其在逃餘匪仍著崑
壽督飭將弁等跟蹤搜捕以期一律肅清毋畱餘孽○諭軍機大
臣等英桂奏馳抵歸德先清內患並請飭兩江安徽接濟口糧一
摺據稱歸德附近數十里土匪四起若不先行剿除必致勾結爲
患見在兵勇數止三千餘名俟兵勇催齊先將內地匪徒剿盡卽
行會兵追剿固係爲慎重後路起見惟據另片奏該匪一撲禾城
一撲鹿邑漸有北竄之勢該撫萬不能專顧撫綏致增遲滯鄭魁
士曾否到毫未見奏報塔思哈則已在宿州興慶之兵尙未見奏
報出境宿州之圍是否已解著和春福濟嚴催鄭魁士等所帶各
兵四路兜剿英桂總司會剿亦當疏通道路聯絡軍聲迅速布置
豈容以道路梗阻爲詞致遲進剿使匪勢更形猖獗至所稱江皖

兵勇口糧請由兩江安徽督撫接濟等語見在豫省籌備以應急需庶免停兵待餉之患其托明阿軍營派出馬隊各兵卽著托明阿傳知文煜糧臺妥爲支應徐州派出兵勇卽著怡良傳知王夢齡妥爲支應並著怡良迅籌款項解交和春福濟再由廬州轉解鄭魁士等各營以備支放英桂督辦三省捻匪一切進剿機宜及籌備餉需均應各路通籌不可遷延觀望自干咎戾將此由六百里加緊各諭令知之○派刑部左侍郎譚廷襄倉場侍郎阿彥達往天津驗收海運漕糧左都御史文彩往通州會同倉場侍郎李瀚辦理驗收事宜○辛巳諭軍機大臣等容照奏連日獲賊情形並請俟宿境稍清馳回揚州當差等語據稱十一至十五等日登陣派隊乘晚縋城均有斬獲十六十七兩日參將塔思哈等帶兵出城殺敗攻城之匪甚多並擒匪首孫開貞一名惟兵力尙單亟

望外援庶可內外夾攻早解城圍捻匪見聚雉河老巢前已疊諭和春福濟飭令鄭魁士馳往剿辦見在宿州危急著卽嚴飭前往應援毋令遲誤其副將朱連泰帶往之戴世熙龔耀倫兗徐各兵前經武隆額札調尙未報抵歸德約計均在毫永一帶可以就近追剿英桂總司會剿到防兵勇已有三千此時後起各兵當亦飛提到宋除抽撥赴援永城外卽著親自督帶分起前進並調江皖協剿之兵分路進攻以解宿州之圍不得久畱歸德至容照因宿城危急無員接濟暫緩啟程著迅催伊興額德昌趕緊由滁赴宿接管馬隊以便容照交卸回揚李鈞所派參將雙慶管帶河標兵三百名已於初七日抵豫並可隨同剿匪此次容照請保在事出力各員仍著英桂查明實在情形酌量保奏將此由六百里各諭令知之○壬午諭軍機大臣等本日據傅振邦王夔齡奏皖匪蔓

延請派北路官兵進剿一摺據稱捻匪圍攻宿州該營鎮帶兵救援行至符離奮力衝殺十九日該匪向西南竄遁城圍已解而蕭縣西鄉青里集等處有藍旗賊五六千人並有大股屯聚灘口欲分路併攻徐州等語徐州爲北路咽喉此時蕭縣境內已有賊蹤該總兵折回本境迎頭截擊惟畱存兵勇僅二千餘名添募練勇三千餘名兵力尙嫌單薄自應酌量調撥以資攻剿但北路官兵未便輕易調動亦恐緩不濟急著托明阿等就近於瓜州軍營內挑選精兵或得力練勇派委妥員管帶迅速馳赴徐州一帶交傅振邦等調遣並飛催侍衛伊興額協領德昌帶領前調吉林馬隊五百名星夜前進毋稍貽誤傅振邦等仍就見有兵勇分路防剿該匪多係烏合之眾如果調度得宜必能以少勝多毋得專待客兵致誤事機並隨時知照英桂合力會剿以期迅殲醜類將此由

六百里諭知托明阿陳金綬雷以誠並傳諭署徐州鎮總兵傅振邦已革暫留淮徐道王夔齡知之○論文煜奏支應馬隊官兵啟程赴豫一摺前諭托明阿挑選吉林馬隊赴英桂軍營已據該大臣於六合浦口兩處抽撥五百餘名派伊興額德昌管帶並經文煜由揚州軍營糧臺籌補欠放口糧配齊軍裝器械前赴河南俟伊星阿等到宿州後英桂即可飭令容照回揚惟該侍衛原帶馬隊五百名亦係歸英桂調遣合之此次與伊興額德昌所帶數約千名距揚道遠擒匪蹤迹無常進剿卽無定所斷不能仍由揚州運送糧餉致滋貽誤據文煜奏河南本有前撥應解江北糧臺銀六萬五千餘兩著英桂卽將此款抵撥爲支應馬隊軍需之用其揚州派往支應容照官兵之通判蔡允壽並著英桂飭該員仍回文煜糧臺以資差委本日又據傅振邦等奏於夾溝驛剿匪獲勝

並聞蕭縣有警該署鎮折回一勦宿州解圍徐州喫重等情已諭令托明阿再行酌撥兵勇往援徐州矣英桂職任督勦當懷遵前旨探明賊在何處卽速派兵策應毋徒株守歸德致聲勢隔闌令該匪更肆猖獗也將此由五百里諭令知之○諭前因胡林翼奏請飭粵東購運洋礮當經諭令葉名琛等趕緊購運五百斤以上千斤以下洋礮六百尊解赴湖北軍營諒已遵旨辦理本日據胡林翼奏沿江一帶見須分撥戰船扼守以絕賊糧軍火惟水師十營大礮甚少且模範太小不能利用著葉名琛柏貴仍遵前旨速購千斤重洋礮三百尊六百斤八百斤重洋礮三百尊派委兵弁妥爲護送由湖南舟運解赴湖北胡林翼軍營應用毋誤要需將此由六百里諭令知之○官文楊載福胡林翼奏臣等連日激勵各軍期將省城一鼓而復惟自我軍兩路偪圍城外之溝壘日增

又益以興國之賊萬人困守堅城以老我師十二月初二日陸師
羅澤南李續賓率眾直攻八步街口二壘以奇兵襲壘之後諸勇
偏近壘前拋擲火毬火箭壘中火起賊眾敗還諸勇乘之以入截
殺最多遂將八步街賊壘攻克初六日臣胡林翼督同羅澤南李
續賓分攻各門賊悉眾來拒督勇截殺賊眾敗歸塘角初十日李
續賓往攻塘角蔣益澧以左營前驅適賊出隊掘溝諸勇往撲賊
潰李續賓率右營後營乘之直逼塘角賊悉入壘抗拒我軍三面
圍攻奪入賊壘縱火焚燒適值賊之火藥由興國州解到者尙存
壘中一時火起賊眾死亡殆盡乘勝將漢陽門外之壘踏破所設
船廠一併焚毀賊之焚死殺死及投江死者數以千計城賊由竇
伏行溝內思截我軍李續賓據險以待羅澤南從洪山馳下由小
東門城根截出李續賓等復由小龜山殺下竇營訓營亦從城根

衝出賊乃竄歸十一日李續賓羅澤南兩路接戰獲勝斃賊千餘
又伏兵截殺賊七八百名賊復於望山門外築葺石壘二座斷我
師進攻之路十八日我軍破其前壘賊復加修次壘高與城等自
沙洲之壘與塘角之溝日益高深二十日三路進攻踏破土壘二
座將守壘之賊悉行駢斬復誘殺城中之賊數百名二十三日李
續賓出窯灣一帶截賊之餉賊率大股七八千人由塘角經小龜
山沿湖而下李續賓督勇數百據險以戰賊眾莫之敢撓羅澤南
由洪山東西分兵鈔出前後夾攻賊大潰敗殺斃及溺死者無數
計自十二月初二日至二十三日城之東路南路東北路西南路
賊壘均已蕩平而江岸西北一隅之賊壘未破各營登城破壘受
傷甚多而士卒奮勇無一退卻臣楊載福率水師於十二月初二
日自沌口出隊至鸚鵡洲派萬化林從鮎魚套下口攻勦墾定國

等從鮎魚套上口攻勦李成謀張啟基等攻勦南岸觜塘角二處南岸觜外水落洲藏有賊船數十號我軍攻撲數次未能踰越遂併力以攻塘角賊船中雜有糧食坐船有隙可乘我軍奮勇攻撲賊勢不支焚燒賊船百餘號殺賊千餘餘船逃竄追至青山收隊萬化林等攻打鮎魚套亦焚燒賊船二十餘號並登岸攻破賊壘一座得大礮二十餘尊初三日各營復出隊夾攻壘賊逾時李成謀奮勇衝入賊隊張啟基李濟清繼之賊始敗退仍依泊土城之下李成謀等從下擊之張榮貴等從上截之賊船火器齊施我軍不退一步船上之賊盡行擊斃復以大礮圍衝將其船隻擊壞臣楊載福卽飭萬化林等三營回紮沌口而自率瞿定國李成謀等仍紮漢口下游北岸帶兵都統都興阿見水師下駛率馬隊馳三十里駐江岸以守護之露宿兩日夜屹立不動水師將弁倍形感

奮而馬隊亦因水師之敢戰故露處兩日夜而不言勞也初四日萬化林等三營自沌口出隊李成謀等七營由下攻上賊死守不出因思上游賊船未盡終不便久泊下游遂率十營回紮沌口初五初六等日率兵往攻賊竟以負固不出爲得計連戰數日共燒賊船百數十號擊斃賊匪甚多十九日夜縱放火船焚燒南岸醬洲外賊船數十隻鮎魚套上口賊船二十餘隻二十日進攻鮎魚套又斃賊約數百名營官喻吉三受傷猶能力戰不退經旬以來水師疊獲大勝而弁兵亦多傷亡然無一船損失無一人退卻臣等仍令水陸暫養數日設法併力攻剿以期迅復堅城得旨嘉獎

○癸未諭內閣和春福濟奏官兵圍攻舒城斬殺逆匪多名克復縣城一摺逆匪占踞舒城負隅抗拒經提督秦定三督率官兵節次痛剿茲和春等飭令總兵珠克登等帶領兵勇於正月十二日

直逼城下四面圍攻該匪火藥轟發自相驚亂我軍乘勢擁入奪獲賊壘三座砍斃賊匪一千數百名生擒三千餘名十三十四等日疊有斬擒於十四日夜間復派總兵郝光甲等帶兵分攻各門已革總兵音德布等由東門首先登城參將富昌都司聶桂榮等亦同時由各門緣梯而上齊聲喊殺火光燭天官軍乘勢衝下逆匪自相踐踏砍殺無算其竄出之賊復經秦定三等截剿追至七里河將騎馬賊首五名殺斃統計斃賊三千餘名砍獲首級二百六十七顆生擒一百三十二名立將縣城克復著和春等卽飭在事文武乘勝迅速前進將巢縣等城次第收復毋稍延緩○諭軍機大臣等前據赫特賀奏聶拉木官軍失利當經諭令滿慶挑派土兵馳赴後藏並親自前往與赫特賀會籌剿辦此時諒已啟程前進本日據赫特賀奏廓番投遞夷稟譯出呈進在該夷或以天

氣嚴塞藉作緩兵之計或藉探我軍虛實均未可知惟聞夷寨內
於興兵打仗均以唐古忒爲辭不敢謂與天朝抗拒並有懇求施
恩等語或因宗喀等處官兵屢勝心存畏懼亦未可定赫特賀見
已揀派番目前往夷營查探情形滿慶到後卽著與赫特賀悉心
籌酌如該夷果知悔罪卽可乘機開導諭以各卡均爲我地不當
占踞如果悔悟息兵天朝亦必令唐古忒撤兵不相侵犯一面分
派兵丁扼守要隘儻該夷按兵不動切勿先行政擊仍聲言內地
調兵甚眾卽日可到以震懾其心若肯退出占地並遵赫特賀前
次剖斷卽可相機辦理以息兵端滿慶奏前藏漢土官兵已准咨
調派二千餘名其四川省土司兵丁當亦揀派候調該大臣於藏
地情形素爲熟悉廓番雖桀驁不馴應如何駕馭使就範圍卽著
與赫特賀妥籌辦法以副委任此次偵探情形卽著迅速馳奏以

慰廩懷將此各諭令知之○以克復舒城賞提督秦定三騎都尉
世職總兵官珠克登頭品頂帶○甲申諭內閣容照奏擊賊大勝
宿州解圍一摺擒匪聚黨圍撲宿州屢經官兵縋城下擊疊有斬
擒本月十八日參將塔思哈等分隊潛出各門併力攻剿先將賊
中車營焚毀該匪倉皇抵拒塔思哈等激勵兵勇銳氣百倍賊勢
不支紛紛潰竄合力追殺計共斃賊二千餘名宿州城圍立解擒
匪烏合數萬經此次剿洗過其兇燄洵足寒賊膽而壯軍威所有
出力員弁兵勇著英桂確切查明擇尤保奏候朕施恩○諭和春
福濟奏查明李兆受滋事案內議卹各員請旨更正等語安徽署
桐城縣事候補縣丞任春和署英山城守營把總高長發前據和
春等以該二員被擒首李兆受同時戕害奏請議卹當經降旨允
准茲據該提督等查明任春和手格擒匪身受多傷絕而復蘇高

長發受傷甚重遇救得生所有該二員前得卹典均著該部註銷
任春和遺失縣印例有應得處分惟該員挺身殺賊曾受重傷著
將應得處分寬免○容照奏擒匪張落刑見有五大股分五色旗
幟每股約有三三萬自領黃旗一股盤踞雒河餘股四出分擾此
外大股如夏白李大濬樊懋修任乾等爲之羽翼若進剿張逆則
夏李諸賊擾我後路且夏白等大股屯聚宿境之南平孫町一帶
倚張逆爲聲援該處距宿州迤南僅四五十里去懷遠靈璧等處
均不過數十里見聞壽春鎮總兵鄭魁士剋日到宿當與安商進
剿機宜先將夏白等巢穴痛加勦洗不惟宿州去肘腋之患懷靈
一帶可以保全卽將來進兵亦可通行無礙張逆羽翼旣除然後
相機節節進剿其黨雖眾究多烏合自不難於撲滅 上諭軍機
大臣等英桂於十三日馳抵歸德已越旬餘後起官兵當已陸續

到防前奏所稱先清內患不過本境土匪自必易於按捕不至牽掣軍行見在塔思哈等兵勇在宿州剿匪尙爲得力鄭魁士亦剋日到宿著英桂迅速調度先將夏白等股剿辦節節進攻以孤雉河集賊匪之勢進剿自易爲力該匪爲數雖多然不過烏合之眾一經痛剿當必解散見在蕭縣永城鹿邑等處均有匪蹤漸已蔓延北路皖省兵勇赴援皆係由南而北不能遏賊之前英桂旣總司會剿須通籌大局迅速派兵與皖省兵勇會同進剿毋許遷延觀望致誤事機將此由六百里諭令知之○予安徽殉難知府陳源充等祭葬世職○丁亥諭內閣向榮吉爾杭阿奏逆匪接應上游援賊截剿獲勝一摺逆賊困踞鎮江屢圖衝竄本月十一日官軍擒獲賊探知賊欲竄踞高資吉爾杭阿卽飭各營嚴備派遊擊伊經阿等伏兵要隘並飭高資帶兵遊擊張汝霖等整隊夾擊十

五日賊二千餘人由鎮江城潛出分布銀山等處官軍馳往截擊副將慶文等用車礮轟斃賊約二百人次日該逆千餘人由江邊潛行至七里店地方伏兵齊起周天培橫衝賊隊賊眾紛竄復見瓜州賊黨數千分股而出知府劉存厚等分路堵截適伊經阿等自七里店追至並用車礮環擊賊遂廝聚金雞嶺劉存厚等率勇搶上殺斃黃衣賊目二名官軍鼓勇齊登賊眾大潰是日鏖戰五時斃賊約四五百名十七十八等日賊復在上梁誘戰吉爾杭阿卽飭劉存厚等先將山坳伏賊擊散繼以大礮向嶺轟擊該逆另股由山右鈔出均被兵勇截剿斬馘二三百名賊之由寶蓋山合竄者早經各路官兵攔殺數百餘賊鼠竄此次鎮江逆匪鋌險困關經我兵截剿賊計已窮著向榮吉爾杭阿乘賊勢窘蹙迅復城池毋稍延緩○諭前據已革道員石景芬奏攻剿金柱關賊卡焚

燒賊船五隻斃賊三百餘人當經降旨將該革員畱營飭令隨同鄧紹良等認真堵剿以贖前愆茲據怡良何桂清奏稱上年十二月二十四日逆匪直撲青山營盤旋即退去石景芬飭勇窮追被逆匪從旁鈔襲以致委員杜時升陣亡各勇傷亡九十餘人石景芬前奏係捏報勝仗等語已革道員石景芬前令畱營差委原冀其愧奮乃既輕率債事復敢掩敗爲勝希圖冒功實屬昧良業經革職著毋庸畱營差委所帶各勇卽著怡良等飭令江長貴認真簡汰以節糜費而收實效○官文奏查武昌省城惟西面濱江漢陽府城東臨襄河東南西南悉偏江面北蔽龜山僅西北兩路可以進取我軍攻之益急該逆守之彌堅自曾國藩全師赴援江西九江之賊陸續由大江南岸興國武昌一帶水陸紛竄武漢正月十一日臣飭令顏朝斌孔廣順等各率兵勇由五里墩進紮西門

橋分軍進攻令巴揚阿帶馬隊爲合後李孟羣於梅子山一帶爲諸路策應訥欽等帶兵渡河會剿我軍甫抵西門橋逆眾出拒巴揚阿馬隊直前將賊眾衝斷各兵勇奮力擊殺斃賊三百餘名該逆敗歸城壘堅守不出十五日臣令顏朝斌與王國才駐防沌口一軍互相對調以誘之密於五里墩山梁左右伏兵而伺該逆窺見我軍移營紛出大股乘機衝撲我軍佯退已過五里墩伏兵齊起李孟羣親率廣勇復由中路直擊該逆大敗其續出大股援賊被王國才一路自西衝殺共計斃賊三百餘名該逆敗竄回巢我軍併力追捕又殺賊百餘名是夜復擊斃賊數十名該逆經此數次剿敗益復堅守臣見已添設馬步兵勇扼防大江北岸下游沙口一帶並咨胡林翼派勇移紮南岸下游青山一帶遇其外援趕造攻城器具以期迅速克復報聞○曾國藩奏臣前調周鳳山一

軍飭令先攻瑞州後勦臨江以瑞州逼近省垣僅百二十里也厥後周鳳山至省與陸元煥等熟商瑞臨在河之西與省城尙有一水之隔樟樹鎮在河之東於省城尤爲肘腋之患遂舍瑞州不攻改爲先攻樟樹次勦臨江之策迨克復樟樹一鎮新淦一縣本可渡河以勦臨江矣因吉安被圍緊急司道等移文周鳳山屬其赴援以解吉安之圍而臬司周玉衡知府陳宗元在吉安圍城之中亦飛書請援於周鳳山往返耽延遂逾二旬見臣與撫臣文倭函商省城爲根本之地瑞臨爲切近之災決計先勦臨江不得以四處告警東瞻西顧徒延時日此周鳳山一軍未克遽赴瑞州與臣前奏不符之實情也九江爲陸路入省之驛道南康爲水路通省之總匯青山距兩府城各四十餘里臣之水軍久駐青山兩岸皆以陸軍護之實與九江呼吸相通自周鳳山請軍撤去之後九江

小池口湖口梅家洲四處之賊日夜環伺十一月二十日東岸湖口大戰臘月初三日西岸青山大戰幸獲全勝厥後又有土匪二千餘人自湖北興國州來竄踞德安縣城聚散無常臣處青山老營防禦五處之賊陸路存營之數不過二千九百人水路存營之數不過二千三百人兵力至爲單薄伏念臣軍自岳州而下水陸萬餘人合併一支從未分散去歲以來陸軍分爲三支羅澤南率援鄂之師五千人爲一支李元度等率平江各勇三千人爲老營一支水軍分爲兩支武昌十營楊載福所統者爲外江一支鄱湖八營臣新調彭玉麟來此統帶者爲內湖一支既已分而爲五矣而李元度駐湖之東又抽撥平江勇虎勇千餘人駐紮西岸是陸軍三支之外又分一小支外江則李孟羣帶船六十號別在襄河內湖則前撥船三十號外頃臣又飭彭玉麟帶船三十號馳赴臨

江是水師兩支之外又分二小支愈分則人數愈寡氣勢愈弱其

在湖北者距

臣

八百餘里在臨江者距

臣

五百餘里雖欲急圖合

併而勢有不能至於行軍之道擇將爲先得一將則全軍振失一

將則士氣消甲寅秋冬間

臣

軍所以長驅千里勢如破竹者以陸

路有塔齊布羅澤南水路有楊載福彭玉麟諸人軍中士卒皆以

塔羅楊彭爲法沿江村市亦知有塔羅楊彭之稱故能旌旗生色

席卷無前不幸塔齊布中道殂謝而羅澤南楊載福彭玉麟又分

往湖北臨江不克遽聚一處後起之才如周鳳山李續賓李元度

數人者又未知果能血戰成名仰邀恩眷否

臣

惟當督飭老營水

陸嚴防五路之賊一俟湖北臨江兩處勦辦得手再圖會合歸併

一軍歸蕩羣醜報聞○是月蜀緩安徽壽州等二十州縣及屯坐

各衛被災地方新舊額賦江蘇太倉等四十六州縣被水被旱上

年額賦展賑直隸開州等六州縣河南蘭儀等六縣被水災民一
月口糧緩徵直隸開州等五十八州縣被水村莊新舊額賦山東
高唐等六十七州縣及德州等四衛被水莊屯本年額賦山西洪
洞縣被賊災民應完倉穀

東華續錄

一咸豐五十七

臣王先謙敬編

臣陶澐宣恭校

二月辛卯諭內閣前因御史李鶴年奏敬陳管見各條當交軍機大臣會同該部議奏茲據文慶等會議具奏向來月選揀發分發各員原應依限赴省赴任乃近來用兵省分揀發人員往往經本籍及經過地方督撫大臣畱營差委或畱辦團練防堵等事甚至特旨簡放之員亦復觀望徘徊延不赴任似此規避取巧以致員缺久懸尙復成何事體著各省統兵大臣及各該督撫等查明從前奏畱各員如有已著勞績保奏有案者仍准畱於該處差委其餘並無勞績者自奉旨之日爲始勒限飭赴本任本省不得復行藉詞奏畱仍一面報部查覈嗣後月選揀發分發人員概不准經

過地方督撫大臣奏畱差委其推升軍務省分人員應行引見赴任者如原省本無軍務仍不准奏畱展限如有借端奏請者卽著該部查明奏參至失守城池罪名綦重各省州縣賊至則稱出城堵禦賊退又稱帶兵收復紛紛開脫何以申法紀而肅官常嗣後失守城池各員仍著照本例定擬罪名必實係禦賊接仗身受重傷或真能督率兵勇隨同克復城池情節實有可原者方准各省統兵大臣及督撫等奏明請旨不得概以功過相抵等詞曲爲開脫至前任河南開歸陳許道周煦徵被參各款雖據英桂查明並無實在劣迹請仍畱該省另補著送部帶領引見再降諭旨○諭軍機大臣等本日據容照鄭魁士奏進剿南屏殲斃賊首獲勝一摺又另片奏英桂咨調馬隊官兵赴豫請旨遵行等語捻匪攻撲宿州解圍後尙踞宿境東西南三面附近村莊容照等見已克復

南屏集正可乘勢將附近匪巢次第剿洗不得株守宿州若將容照所帶馬隊調赴豫省恐該處兵力愈單不敷剿辦永城鹿邑之匪每股約二三千人該撫已派王建泰等馳往鹿邑並抽撥兵勇二千赴永城攻剿邱聯恩計已行抵陳州以見在情形而論皖境之匪多於豫境而河南所謂之兵數已不少自不難肅清本境所有宿州馬隊著毋庸調至河南英桂總司會剿原當統籌大局不應但防豫省以致緩急失宜節次諭令該撫或自行統兵出境或酌派兵勇赴皖會同進剿諒必遵照辦理矣容照帶兵是否得力仍著英桂查明酌量或暫畱剿匪爲伊興額等後路策應卽令該侍衛毋庸回揚州軍營將此由六百里加緊諭令知之○壬辰諭內閣前據駱秉章奏湖南鳳凰廳剿匪出力之各苗備弁請准撥入綠營一摺當交兵部議奏茲據裕誠等奏稱見當黔匪滋事竄

入該廳苗地該苗備弁尙能約束良苗兼資勦捕誠屬深明大義自應破格優獎著准其於事竣後將該苗備弁曾經賞給翎銜者擇其尤爲出力之員據實保奏撥入綠營學習敘補嗣後不得援以爲例至其分營敘補如何限制章程及補用後能否鈐東內地兵丁杜絕苗匪勾結之處仍著該撫詳細體察一併妥議具奏○諭軍機大臣等滿慶奏達賴喇嘛圖寂將商上事務暫交呼圖克圖掌管一摺據稱呼徵阿齊圖呼圖克圖人尙穩妥從前曾代辦商上事務數年均無乖錯見因達賴喇嘛圖寂該大臣已將一切事宜令該呼圖克圖暫行代管惟以後商上事務該呼圖克圖掌辦能否勝任著滿慶悉心察看再行具奏至唐古忒僧俗人等見在是否照常安靜並著該大臣妥爲彈壓毋令滋事將此諭令知之○諭前因英桂督剿捻匪不便停兵待餉托明阿軍營所派馬

隊已諭令由文煜糧臺支應口糧徐州派出兵勇諭怡良傳知王夢齡支應見在各股捻匪仍踞雒河集宿州雖經解圍近城尙多賊巢蕭縣一帶亦復告警徐州喫重已諭令英桂出境就近調度惟豫省藩庫十分支絀所有江皖兵勇口糧自應各路通籌以免貽誤著怡良吉爾杭阿仍遵前旨飭令文煜將伊興額德昌容照先後派往之馬隊千名應需餉糈由揚州糧臺源源接濟雖河南本有前撥應解江北糧臺銀六萬五千餘兩可以由豫抵撥亦須寬爲籌備以濟不及其清江設立捐局本爲協濟軍餉之用徐州所派兵勇除由王夢齡支給並著邵燦隨時酌撥解往接濟毋使缺乏至和春福濟上年請撥江蘇三關稅銀每月共五萬兩本日據該提督等奏兩月以來惟淮關一萬如數撥解江海關僅解二萬許墅關未解絲毫見在皖省需餉孔亟著該督撫仍飭各關按

月照撥不得延誤將此由五百里各諭令知之○諭英桂奏嚴催兵勇分援永城夏邑並徐州蕭縣一摺昨因宿州附近尚多賊巢鄭魁士等尚須就近剿洗諭令英桂統籌大局不得但防豫境茲據奏稱蕭縣告警徐州防剿喫重飛催鄭魁士帶兵救援但見在宿州城圍雖解而賊巢未盡剿除若令該總兵赴援蕭縣恐宿州一路兵單賊勢復肆猖獗著該撫仍遵前旨飭令鄭魁士等攻剿宿州附近賊巢一面嚴飭傅振邦興慶王夢齡等於徐州一帶嚴密防範如該處兵力不敷卽由歸德撥兵救援該處距徐州尚近不至迂途又前因徐州兵單曾諭托明阿等酌調兵勇馳往應援見在徐州喫重英桂卽可趕緊催提以資防剿較之調鄭魁士兵更無顧此失彼之患至歸德道路漸次肅清永城夏邑之賊卽飭邱聯恩等督兵剿辦本日據和春等奏正陽水陸要衝爲匪徒出

沒之區張落刑老巢尙在雉河集一水可通侍衛多慧自應仍畱
正陽扼要防守毋庸調往河南所有沈邱太和等處匪眾卽令武
隆額會同該地方官實力堵截如兵力不敷並著另行籌撥該撫
總司會勘疊次諭令出境督辦原以擒匪蔓延三省地方各路軍
營必須聲息相通方能隨時策應不至緩急失宜卽如伊興額等
已到宿州而該撫尙未知悉可見遠駐歸德於一切軍情未能深
悉著卽懷遵前旨出境督剿毋得株守一隅致於全局未能控制
所請軍餉一節河南本有應解江北糧臺銀六萬五千餘兩可以
抵撥本日復諭令怡良邵燦吉爾杭阿寬爲籌備該撫仍應先行
墊撥毋得專待部省解款致誤要需將此由六百里諭令知之○
諭和春等奏軍餉缺乏請飭浙江酌量籌撥等語皖省克復舒城
後亟須進剿桐廬祇以餉銀未能湊集軍行坐致遲延見在賊勢

漸衰正宜乘機進取若因待餉之故使軍情不能踊躍誠恐有誤事機著何桂清接奉此旨後卽行籌撥銀十萬兩或八萬兩分起解皖接濟兵餉務於二月內先解一半其餘俟三四月間陸續解齊以應急需將此由五百里諭令知之○甲午諭內閣向榮奏請將已革道員畱營效力等語已革江蘇蘇松太道吳健彰著暫畱向榮軍營效力贖罪儻不能得力卽著仍遵前旨發往新疆毋得稍涉回護○諭蔣蔚遠孝順奏克復府廳一摺貴州銅仁匪徒徐廷杰等分股撲陷松桃廳思南府等處經署思南府知府福奎等招集兵練分路進剿賊眾潰竄當將思南府城收復其闖入松桃廳城匪徒亦經該廳同知恩彬督率紳士土官糾約兵練進剿賊勢不支開城逃散當將松桃廳收復其自湖南永綏廳敗回之賊亦經兵勇邀擊獲勝此次克復兩城剿辦尙爲得手著蔣蔚遠等

卽飭該府廳接覈地方餘匪以期肅清所有署思南府事石阡府知府福奎署思南營遊擊富珠隆阿署安化縣知縣吳雲煦松桃直隸廳同知恩彬於失守城池後卽能迅圖克復尙知愧奮著免其查辦開缺紳弁兵勇著該撫查明請獎○諭蔣霽遠孝順奏思州石阡剿匪情形請將失事員弁暫行革職分別覈辦等語貴州銅仁匪徒竄入思州府及青谿玉屏兩縣境內雖經該府等派出文武激勵紳團殺賊無數卽將三城收復而防範不嚴實難辭咎思州府知府張瀚中署玉屏縣兼管青谿縣事保升知縣吳曾保均著暫行革職畱任仍著該撫等將收復日期及該員弁有無逃避倉庫監獄有無損失各情迅速查明辦理至石阡府地方失守已將兩月該處官弁並不力圖克復尤屬延玩署石阡府事坐補都勻府知府黃培杰署石阡營都司黎平營守備陳定元均著先

行革職暫畱署任責令戴罪自效儻再不知愧奮卽行從嚴參辦
○諭軍機大臣等托明阿等奏籌撥兵勇赴南岸助剿並瓜州接
仗情形一摺瓜州蕞爾之區被賊占踞托明阿自督師以來總未
實力進攻以致久稽克復卽如正月十四十九等日之戰皆係賊
匪前來撲營勉強開仗英貴等雖有斬擒而東南營盤被焚遊擊
王永等陣亡實屬可惜且賊匪被擊退去官軍並未前往追剿並
以連日大雪途多泥淖未能進攻爲辭似此懈弛遷延實堪痛憾
見在南岸賊眾麤集竄擾意圖內犯情形極爲喫緊但能北岸實
力攻擊亦可稍分賊勢著托明阿等督飭水陸各軍迅速進剿務
將瓜州賊巢剋日掃除毋再耽延致干咎戾將此由六百里加緊
諭令知之○向榮奏官軍連日進攻三汊河等處賊壘該逆扼險
相持未能得手賊遂分股由關江牯竄至楊家壩陳莊一帶築壘

嘯聚距倉頭鎮三四里查倉頭介於龍潭下蜀街之間乃我軍往來要道其內通句容丹陽各路旁竄尤屬可虞臣前已令余萬清

妥籌兼顧並飛飭德安等前往會同堵紮正月十一日果有賊股

竄越倉頭經余萬清派兵將賊擊走斬殺數十餘人十二日余萬

清會同總兵虎嵩林副將蔡應龍分路進剿該逆出拒我軍槍礮

連環斃賊無數突有大股賊由上游繞出倉頭大路分撲我營余

萬清等督兵分投鈔殺奮力鏖戰擊殺執旗悍賊數十名賊眾敗

退倉頭距河密排槍礮十四日張國樑會同秦如虎督兵至丁家

邊地方余萬清等軍亦由下蜀街齊出攻剿虎嵩林蔡應龍等同

時趕至將賊衝爲兩截俘斬無算該逆奔敗回巢張國樑復會同

秦如虎於倉頭街後斃賊一百餘名適三汊河之賊潛出窺我營

盤當卽撤隊回救逆匪遁去十五日總兵德安等揮兵直攻張楊

村三汊河賊壘該逆出黨數千蠡擁前來我軍槍礮齊施斃賊一百數十名張國樑秦如虎復督兵分隊衝剿燒毀附近賊壘房屋連斬騎馬賊十餘名賊陣大潰惟賊壘濠寬籤密槍礮排開難以得手伏思此次竄賊雖挫其鋒無如賊蹤愈竄愈前逼近腹地我軍自仙鶴門以至東陽龍潭下蜀街分屯百里兵力愈單而處處皆關緊要幾於剿不勝剿防不勝防前經臣咨商怡良吉爾杭阿調兵防守丹陽以固蘇常要隘見在倉頭有賊則句容又爲喫重且係大營後路復咨商添調官兵赴句紫堵籌調水陸壯勇趕赴下蜀街一帶防剿並以蕪湖餘賊無多檄鄧紹良將兵勇暫交江長貴統領卽日酌帶勁兵數百名趕回金陵面商剿堵機宜並抽撥龍潭張玉良川兵馳往丁家邊協堵撤回張國樑至仙鶴門營盤調令遊擊李鳴勳勇五百名移紮牌頭庵聯絡東陽龍潭以壯

後路聲援十六日倉頭石埠橋賊匪窺伺龍潭分股來犯勢甚兇悍經官軍四面攻剿轟斃不下三四百人同日余萬清虎嵩林兩面夾攻焚破韓家村賊壘一座十八日遊擊李定太等移紮顧家壩遇賊於施家村卽與余萬清派出各隊分投截剿連斬架賊多名殲斃無數該逆紛紛敗退追奔數里整隊撤回申刻復有大股賊匪由顧家壩進口竄越嚴巷一帶余萬清飛令李定太楊瑞乾等趕由六里店繞出亭子岡關頭截擊該逆未敢前竄十九日黎明該逆已於顧家壩口築壘並分踞嚴巷各村四散擄掠查六里店前之夏家邊係句容丹陽兩處要衝可堵賊旁通內犯之路特調令楊瑞乾等移至夏家邊紮營相機截剿並派兵勇扼紮亭子岡以爲犄角另派兵填紮沿江各營與下蜀街互相聯絡以壯聲勢而防下竄先是臣聞逆竄嚴巷不勝憤懣適鄧紹良由蕪湖到

營臣與之面商機宜檄令統領下蜀街東陽龍潭諸軍於二十一日先赴龍潭布置周妥抽帶楚兵凱勇八百名連夜馳赴六里店會同余萬清速商剿堵並帶去吉林黑龍江馬隊二百名咨商吉甯杭阿屬令京口副都統綢閣前往統帶助剿將調到之儀徵六合水勇分布高資下蜀街沿江地段並飭總兵明安泰由秣陵關馳往句容設防駐守以杜內犯上諭逆黨由洲地一路前竄急思內犯前據向榮奏自東陽以至龍潭下蜀街連營三十餘里堵扼周嚴並調下游戰船分泊高資一帶添調兵勇駐守丹陽業經諭令向榮等迅將棲霞石埠橋之賊併力剿擊毋令內竄乃覽本日奏報三汊河賊壘尙未剿除而該逆已由攔江舖等處竄入倉頭鎮倉頭賊黨尙未擊退而該逆已由顧家壩竄越嚴巷是其內竄之路漸偏漸近且處處築壘以阻我軍聲勢若不併力急攻儻

丹陽句容稍有疏虞全局何堪設想前此秦如虎欲過三汊河紫
營而河北先爲賊踞該大臣令余萬清力扼倉頭而賊已先踞倉
頭河岸李定大方欲由丁家邊進屯顧家壩賊轉從顧家壩竄過
嚴巷似此著著落後則雖稱夏家邊亭子岡等要隘均有屯兵亦
屬有名無實此時江南北別無可以添撥之兵就該大臣見調兵
勇計之爲數不少但能分投截擊將最悍之賊最堅之壘剿除一
二處則賊鋒漸挫兵力自能施展著向榮吉爾杭阿嚴督鄧紹良
等務將三汊河倉頭嚴巷等處賊壘悉數掃除應扼要隘萬不可
再任該逆占踞該大臣等不能迅克金陵鎮江遷延已甚若再不
力圖扼截以致常州腹地復有震驚恐不能當此重罪也將此由
六百里加緊各諭令知之○托明阿等奏籌撥兵勇馳赴南岸堵
截金陵下竄逆匪遊擊王永等追賊陣亡請飭優卹得旨瓜州賊

匪屢次衝突英貴等分投截剿尙屬奮勇惟賊出可以接仗賊退
卽無法進攻徒作焦急之語以掩遷延之咎何日方可奏功且屢
傷勇弁甚屬可惜卽如王永人頗去得前經訥爾經額保舉曾蒙
召見朕不知者尙不知凡幾托明阿等日久無功不過時閱數旬
敷衍入奏殊失朕委任之心汝等自返而思能無愧乎○予江南
陣亡遊擊王永等貴州陣亡教授張鴻達等祭葬世職○丙申諭
軍機大臣等前因張家口監督慶文奏請將朝陽村商貨先行照
例納稅一摺當交戶部查議具奏茲據該部奏稱道光二十九年
都統雙德等奏請將朝陽村貨物歸入市圈一體納稅經該部議
駁有案應仍遵照舊章俟貨物進口時嚴密稽查照例收稅所有
該監督請將朝陽村鋪戶販貨到村時先行納稅之處應毋庸議
等語張家口市圈商人由恰克圖販貨進口時先行納稅係道光

五年定例並無朝陽村收稅之事自未容輕易更張惟該監督原奏內稱朝陽村鋪戶開設至二十餘家半係市圈分設若不令其納稅則將來市圈鋪戶紛紛遷至該處開設恐有稅之處俱成無稅張家口歷任鉅虧未必不由於此等情該監督所奏是否因該商人等在朝陽村國貨即可繞越他處銷售偷漏稅課抑或句通口內胥役私行進口致有漏稅著穆隆阿慶昀秉公查訪應如何變通辦理或應仍照舊章設法稽查力除偷漏之弊著卽據實奏聞總期於國課商情兩無窒礙毋得稍涉遷就慶文原奏及戶部摺均著鈔給閱看將此諭令知之○丁酉諭內閣前因勞崇光奏請飭催實任揀發各員迅速赴粵並請將改省指省人員酌議章程定以限制交部聚議具奏茲據吏部遵議覆奏見在廣西等省辦理軍務在在需人差委部選揀發各員正宜趕緊赴省豈容任

意趨避以致委任乏人嗣後用兵各省揀發分發人員均著依限赴省概不准報捐離省改指他省其實缺人員無論特旨簡放以及月選推升均著領憑後卽行赴任不准改捐降捐如有遵例捐升者統俟到省到任後呈明該督撫酌覈辦理不得於未到之先捐升歸選其軍務省分告病人員亦不准於病痊後捐免坐補原缺改捐別省以杜規避至各該員中如有實心任事不避艱險於地方實有裨益者並准該督撫不拘年限資格切實保奏請旨錄用○戊戌祭大社大稷○上御經筵○己亥曾國藩奏撫臣文俊與臣函商以瑞臨逼近省垣決計先剿臨江周鳳山未經奉札之前陸軍在新淦縣水師在樟樹鎮中隔七十餘里兩軍不相聯絡周鳳山因撥岳炳榮等帶勇八百人回駐樟樹護衛水師詎臨江之賊偵知官軍分支人數單薄遂由上游偷渡悍賊四五

千人正月初二日來撲岳炳榮等營岳炳榮匹馬衝突十餘次奈眾寡懸殊漸退入營該逆層層包圍自卯至午火藥罄盡營盤被陷士卒傷亡二百餘人岳炳榮衝出重圍奔至豐城收集餘勇該逆乘閒直上新淦冀撲周鳳山之營周鳳山亦率全軍折回樟樹初三日與賊遇於瓦山地方該逆分爲六股周鳳山傳令各營先據山嶺紮營以高擊下自督都司滕國獻畢金科擊樹林之左兩股都司周岐山唐得陞擊樹林之右兩股參將阿達春都司李新華擊隄上兩股我軍奮不顧身衝入賊隊鏖戰逾時殺賊一千餘名賊眾敗竄各營奮追二十里又斃賊三四百名偪入河中死者無數生擒八十餘名當初二日賊撲樟樹陸營之時水賊亦有戰船順流而下西岸又有陸賊二千人助之知府劉于濤派千總李逢春等擊江中之賊舟余化南等擊東岸之陸賊吳步鼐等擊西

岸之陸賊旋見旱營火起岳炳榮等陸兵失利劉子潯自上戰船
直前接應喊聲雷動分兩岸窮追賊船大小三十五號悉被我軍
包裹賊抵敵不住紛紛斬斷繩索棄船下水溺死者不計其數在
船者盡被殲斃奪得長龍賊船四號燒毀三號擊毀西岸賊壘二
座奪獲大礮十一尊火藥十餘石初四日彭玉麟抵樟樹鎮初七
日賊用大船自上游放下意圖衝動我營而戰船與小划繼之彭
玉麟督同都司孫昌國帶三板十餘號前進賊舟退卻進逼臨江
河口我軍連環轟擊賊以小划抵敵而其大者盡退入口內挽絙
上行我軍盡奪小划擊斃多賊乘勝衝過賊壘追入內河搶賊糧
船三隻拆毀浮橋初九日彭玉麟督孫昌國等至臨江河口攻打
賊壘斃賊甚多該逆棄壘逃退入城各水勇登岸將其護牆望樓
全行踏毀伏查瑞臨袁三府淪陷吉安被圍西路業已糜爛撫建

各府在贛水大河之東久爲該逆所窺伺幸去臘有樟樹之克今春有瓦山之捷賊匪兩次東渡均被我軍擊敗水師扼泊樟鎮疊獲勝仗東岸當可無虞口內浮橋造成陸師西渡卽當激勵將士迅克臨江以慰聖主睠懷南服之意又奏正月十八日都司黃虎臣武生黃之一等分路進攻九江府城行抵東城多方挑戰該逆負隅不出黃虎臣飭哨官李大雄伏於左詹榮清伏於右自帶小隊誘敵出城至路徑歧隘之處黃虎臣回兵大戰兩路伏兵衝出勇氣百倍該逆回奔追至城根奈城上礮石過多僅殲二十餘賊當東城接仗之時西門出賊三百餘名由接官亭至鳳凰山意圖鈔東路官軍之尾武生黃之一自西突出率弁勇衝入賊隊連斃三十餘賊賊遂潰敗該逆復糾悍賊五百餘人戰船八號由水路猛撲我軍且戰且誘佯爲退走迨與遊擊曾昭麒接應兵近復

同旗大戰殺賊八十餘名溺水者不計其數此次兵勇僅及千人
進攻潯城均以佯敗取勝可否獎拔數人歸於樟樹鎮案內彙保
之處出自 天恩 上諭內閣此次水陸大捷著曾國藩卽飭周
鳳山等乘勢克復各城毋任久踞都司黃虎臣等進攻九江誘賊
出城截擊獲勝殺賊甚多所有出力員弁著准其歸入樟樹鎮獲
勝案內一併保奏○諭軍機大臣等曾國藩奏軍餉不繼請於上
海抽取釐金接濟等語江蘇省抽取釐金所有上海地方是否一
律辦理見在曾國藩在江西軍餉缺乏但有可籌之款自應不分
畛域力籌接濟惟上海爲夷人通商口岸抽釐之舉於夷稅有無
窒礙著怡良吉爾杭阿體察情形如該處各市鎮行貨可以抽釐
濟餉卽著酌量辦理並照曾國藩所請飭調在浙之前任杭嘉湖
道顧椿會同松江府知府袁芳瑛專司其事俟集有成數奏明候

撥備上海未辦抽釐而於商情或有窒礙亦著據實奏聞毋庸勉強遷就將此由六百里加緊諭令知之○諭英桂奏賊匪蔓延豫境江皖防剿勢難兼顧一摺據稱見在江皖豫三省交界之處匪勢狡猾該撫自馳抵歸德後卽派邱聯恩等督兵迎擊疊有斬擒而賊踞交界道路梗塞江皖兵勇亦屢次調催未能前進該撫止能力遏西北一帶俟豫境肅清始能由東南進攻等語英桂總司剿匪事宜責有攸歸自當不分畛域節節迎剿惟見因道路不通勢難兼顧尙屬實情鄭魁士已抵宿州其皖省捻匪卽著該署鎮會同容照伊興額塔思哈等迅速籌辦暫歸和春福濟就近調度蕭縣一帶兵力較單但揚州營兵已據托明阿奏無可分撥著傳振邦王夢齡興慶等卽就見有兵勇相機堵剿毋令闖入徐州怡良相距較遠卽著邵燦就近調度並籌接濟糧餉毋使缺乏英桂

仍當嚴飭邱聯恩等將豫省捻匪次第掃除一俟道路稍通卽當督兵迅速前進仍將三省兵勇統歸調度毋得株守歸德致令捻匪愈滋延蔓將此由六百里加緊各諭令知之○庚子諭內閣前因太僕寺卿李維翰奏請暫停養廉以充軍餉當交軍機大臣會同戶部議奏經該大臣等議將各直省文職一品至七品武職三品以上養廉暫行減成支放今歲軍務未平但閱時已久恐該員等不敷辦公非所以示體恤所有各直省文武養廉著戶部查照京官增給俸銀章程酌覈具奏○辛丑諭內閣何桂清奏淮鹽由浙運楚事多窒礙請飭停辦一摺前據駱秉章奏請撥淮鹽十萬引由浙河運赴湖南疊經戶部議覆令江蘇督撫妥籌官辦章程以杜商私侵灌尙未據該督撫酌議具奏茲據何桂清奏稱淮鹽運楚必須借資商力私販仍難盡杜且恐停滯浙河隨處滙賣又

與浙省餉鹽同途並運亦有擁擠之虞尙係實在情形所有部議
官運淮鹽著怡良督飭運司卽行停辦毋庸另議章程惟淮鹽頻
歲滯銷楚省需餉甚急前官文具奏淮南運道暫爲試改各情仍
著怡良督飭運司妥議章程實力行運毋得推諉延宕至浙省餉
鹽並著何桂清督飭承辦各員設法疏通源源轉運以資接濟○
順天府府尹蔣琦瀄奏陳克己復禮二箴得旨所進二箴畱覽陳
善閉邪心殷獻納朕已知汝之意而甚嘉也惟汝摺中稱遵先
皇之盛軌止言起用琦善一端朕以涼薄紹膺神器舉凡我皇
考行政用人治法心法無一不應早夜以思勉爲則效朕觀汝之
奏別有意指某事言者何妨明言故作此隱約之詞汝意何居著
將所指之事明白具奏尋奏所進係克己箴故恭引起用琦善一
端以爲舍己從人量同堯舜之一證並非爲見有與前事相同之

事不敢明言而故爲隱約之詞報聞○壬寅諭軍機大臣等本日據英桂奏擒匪全數竄擾豫境請飭鄭魁士等帶兵馳赴歸德會剿又據奏官兵接仗失利擒匪近偏歸德請調北路精兵各一摺擒匪分五大股屯居各村邱聯恩崇安等因眾寡不敵各勇紛紛潰散該匪直偃郡城存城兵勇無多勢極危迫自應厚集兵力以資防剿本日已諭和春福濟迅飭鄭魁士等由宿州帶兵馳赴歸德應援徐州蕭縣見在情形稍鬆並諭邵燦飭令傅振邦由徐州進剿復諭桂良酌調直隸精兵二三千名馳往歸德交該撫調遣目下匪勢狡猾急待援兵速至該撫接奉此旨著卽飛提徐宿兩路官兵一面仍督飭邱聯恩等激勵兵勇爲出奇制勝之計該撫節制全軍若坐困孤城專待外援該匪勢必愈行猖獗設歸德稍有疏虞則全省爲之震動該撫身任封圻貽誤之罪斷難寬宥所

有見在歸德如何布置省城一路如何防備著卽迅速妥籌毋得
徒涉張皇致誤事機將此由六百里加緊諭令知之○諭見在捻
匪聚眾數萬勢極猖獗豫省官軍接仗失利兵力甚單自應厚集
援兵以資剿辦直隸省前派大名鎮兵赴豫助剿不能得力業經
英桂撤回歸伍此時歸德情形萬分喫緊著桂良另行挑選各營
精兵二三千名遴委得力將備星速管帶馳赴歸德交英桂調遣
其直隸交界各要隘並著桂良飭令地方文武員弁嚴密籌防毋
稍疏懈將此由六百里諭令知之○諭捻匪全竄豫境綿亘三十
餘里邱聯恩等兵勇敗潰該匪直逼歸德府城兵勇止五百餘名
邱聯恩等收集殘散亦僅存千餘名防守郡城實形不足見在蕭
縣止賸零星宿州城圍已解夏白等各匪巢業經平毀自應移緩
就急不得各守一隅致誤大局著邵燦飛飭傅振邦等迅速抽撥

兵弁兼程前往歸德應援一面剿除零匪勿令闖入徐州其鄭魁
士塔思哈之官兵伊興額德昌之馬隊著和春福濟諭令星馳赴
豫並交英桂調遣宿州防剿亦須兼顧卽畱容照在彼駐守邵燦
等務卽遵旨飛催若區分畛域令歸德稍有挫失河南省城震動
貽誤大局恐難辭咎也將此由六百里各諭令知之○胡林翼奏
上年十二月二十七日賊於城外挖濠樹柵湘後營劉騰鴻帶二
哨往偵賊見我兵不多出旗來圍我兵隨戰隨退以誘之添撥六
哨一鼓鈔襲殺賊甚多嗣因雨雪連綿不能出戰羅澤南駐營洪
山之南因北路爲山所隔懼賊猝來襲營本年正月十二日羅澤
南移三營駐洪山絕頂爲犄角之勢十三日夜李續賓帶兵往偵
遇賊於雙鳳山下李續賓策馬直進潛分二支包山之趾而及其
脊賊敗羅澤南派兵接應於山之左劉騰鴻接應於山之右斃賊

無數夜半收隊十四日黎明大霧劉騰鴻率兵登雙鳳山巔以劈山礮轟擊大東門城中大亂四面開礮以拒之及霧收賊以千餘人縋城而下我兵力戰以拒之賊不能近又於小東門出千餘人來鈔我後羅澤南督兵從雙鳳山北以迎之鏖戰良久殪其前鋒十餘人賊猶力戰如故羅澤南乃從湖之乾涸處分二支以繞賊之左劉騰鴻驅雙鳳山之賊與小東門之賊聚作一處亦分二支以繞其右皆偪至木柵城上之礮以賊未入不敢開四路夾擊斃賊約六七百人生擒二十五名城中見賊敗遽出隊數千從漢陽門繞沙湖之尾來救李續賓蔣益澧都司何紹彩由小龜山直偪沙湖以槍礮轟擊斃賊最多十八日賊以百餘人猝抵五里墩搦戰我軍按兵不動以百餘勇敢者追至長虹橋賊以千餘人伏於其側我兵退以誘之參將普承堯知府銜唐訓方督勇分路進擊

遊擊張寅恭等繼之分三路以攻其伏盛戰二時之久礮斃其頭
目三人賊敗乘勝尾擊殺斃者數百人二十四日大雪初霽四更
後賊以千餘人撲營猝抵營前拋擲火器營中以槍礮轟擊發無
不中賊大敗棄械而逃墜崖死者甚眾二十五日賊隊來撲中營
登山拋擲火毬羅澤南令左右二哨分路鈔出前哨開營迎敵劉
騰鴻率後營分路繞賊之後賊見我兵出隊乃狂奔其旁遁者多
爲我兵所殺追至城根賊踰柵絕城而上我勇登雙鳳山以劈山
礮擊之墜城而死者無算賊千餘人復捲旗來撲中營我兵之伏
者俟其過而截之中營前左二哨迎之前後夾擊共斃賊二百餘
人二十八日賊由東門而下出小龜山之尾有渡賽湖燒民房者
羅澤南乃飭劉騰鴻率後營以救火分中營二哨往堵大東門何
紹彩率仁勇堵小龜山盛戰兩時斃賊二千餘人官軍正欲收隊

詎塘角忽出賊千餘人從隄上以牽掣左營大東門小東門縋城下者直撲仁營賊氣頗悍仁營分三支應之奮力抵禦不少退卻左營見兩路齊至飭勇駐小龜山巔據險以待分二哨繞小龜山而下以截撲仁營之賊乘勢邀擊賊敗由湖汊逃至城根復頓旗迎戰我軍分投奮迅而前賊又敗斬斃約六七百人餘賊皆遁二月初一日賊防我兵進攻城池欲逼賽湖之水以斷後路以四五百人掘土填橋賽羅澤南飭劉騰鴻督軍隄上率礮隊轟擊賊不能敵直奔中和門東舊壘縋城而上諸勇乘勝尾追作三路包繞城下溝深樁密賊悉陷於溝坑樁籤中我勇火器環擊鮮有脫者賊又以三四千人過鮎魚套橋由八步街衝撲臣飭唐訓方普承堯等督勇至長虹橋迎敵飭丁銳義等由五里墩渡浮橋以禦八步街之賊賊之在長虹橋者見我兵至施槍搦戰我兵俟其近

前始開槍礮以轟之鏖戰二時之久參將葉永泰出湖中遙爲接應賊畏鈔其尾乃敗走各營乘勝追之殺賊數百賊之由八步街出者南營向前截之眾寡不敵勢幾不支我兵之戰於長虹橋者懼對岸有失飭善泗水者踰鮎魚套援之殪斃賊目十餘人賊敗走初二日臣軍與羅澤南軍各出數百人誘賊賊自城上見之亦以千餘人縋城而下我兵爭先奮擊鏖戰逾時斃賊數十人賊緣隄而走我兵乘勝追之殺賊不少水師見在添備火具趕緊催齊臣卽日定期會剿力圖廓清以慰聖懷所有陣亡守備丁懷本千總金品高把總黎文祥向德明秦裕昌外委蕭得勝胡萬隆等屢立戰功奮不顧身深堪憫惻應請旨飭部分別從優議卹得旨丁懷本等均照所請優卹○追予山西殉節知府何維墀知縣周春陽建祠○予江南被戕知縣郭鳳恩祭葬世職建祠○癸卯官

文奏聞湖南舉人左宗棠有匡時平寇之才請飭赴營聽候差遣
得旨著咨詢駱秉章其人才具若何能否赴湖北軍營奏明請旨
尋奏左宗棠已在駱秉章幕中無須咨調報聞○官文奏賊在漢
江北岸搭造浮橋臣恐其潰圍上竄撥兵添紮北岸嚴密防剿正
月二十六日漢江南岸賊匪潛圖上竄已革總兵訥欽密遣兵勇
分投設伏四更時賊大股嚮至我軍礮械齊施賊屍枕藉自相踐
踏溺水死者不計其數訥欽復由上游渡漢進攻至龍鎧隄賊約
數百人蠶擁出戰我軍分路鈔殺賊卽狂奔復殺斃十餘名追至
月湖遇賊礮船接戰又被我軍槍礮擊回賊復由龜山出隊數百
人訥欽派兵至小河口見賊船由晴川閣復來我軍開礮擊沈數
隻賊勢遂卻二十八日夜賊復由水路潛竄我軍縱火燒毀賊船
數隻餘船悉遁二十九日署提臣楊載福礮船由沌口進發副將

顏朝斌督兵進攻漢陽南門賊堅壁不出我軍佯退至三里坡賊忽開城大隊出追我軍折回迎擊楊載福登岸望見親督水勇飛奔接應各勇馳至賊方退入城中忽由西門及龜山下出賊數千分途來犯經李孟羣王國才孔廣順楊昌泗督兵迎敵賊殊死戰巴揚阿顏朝斌等均從南路趕至鈔殺前後夾攻斃賊二百餘名賊復出數千人我軍鏖戰六時之久賊匪大敗三十日李孟羣等復於西門及龍鍾隄兩路力挫賊鋒斃賊四百餘名二月初一日漢陽賊在五顯廟對岸搭造浮橋訥欽卽在該處挑善泅水兵勇數十名乘夜攜刀入水砍其絳纜初二日李孟羣趕飭礮船飛駛助戰訥欽卽令兵勇分撲賊卡斃賊多名時月湖賊船數十隻出隊接應被李孟羣礮船擊退賊卽竄入卡內王國才馳至七里廟等處先後斃賊甚多查武漢自遭淪陷一載有餘臣由德安進剿

以來力攻漢陽大小四十餘戰該逆踞守愈堅賊數愈眾良由賊踞長江數千里之險並有下游武昌興國九江之賊接濟雖軍威大振而兩城尙未克復

臣

惟有與胡林翼隨時商酌設法斷江路

賊援一面嚴督將士剋期殄滅羣醜以副皇上宵旰憂勤之意

報聞○江西巡撫文俊奏吉安府城被圍前經奏調候補知府周汝筠統帶練勇赴援乃周汝筠軍抵泰和專以先克泰邑方可赴援爲詞實屬不知緩急請摘去翎頂以觀後效得旨周汝筠著摘去翎頂如再託故遷延卽行嚴參○陸元烺以病免以晏端書爲江西布政使慶廉爲浙江按察使

由鹽運使遷

○命已革左副都御史

袁甲三隨同河南巡撫英桂勦辦捻匪○予江西陣亡舉人羅子隣祭葬世職○甲辰諭軍機大臣等前因皖省捻匪逼近歸德當令桂良挑選直隸各營精兵二三千名派員帶赴歸德交英桂調

遣諒已遵旨辦理惟直隸毗連豫境交界要隘均須嚴密籌防著桂良酌度情形如該省官兵不敷調撥不必拘定二三千之數或千名或千餘名但須兵力堪用挑齊後遴員管帶前往以資攻剿至直豫交界設防事宜最關緊要該督見在作何布置並著多設偵探將豫省情形隨時具奏以慰廑念將此由五百里諭令知之○調陝甘兵二千名山西兵一千名赴河南剿賊○乙巳諭內閣蔣蔚遠等奏剿辦定番州境匪徒克復大塘汛城一摺貴州都勻等處苗教各匪竄擾定番州境大塘汛城陷失當經蔣蔚遠等委署鎮遠鎮副將佟攀梅帶兵進剿提督孝順帶兵由雷波巖腳一帶會合將大小牛場等處賊寨概行焚毀佟攀梅由定番之打華哨擺金一路進剿至大塘城外連戰斃賊數百名進攻大塘汛城守備王敦倫等拋擲火器我軍乘賊驚亂一擁登城當將城池克

復餘賊逃遁生擒賊首吳鳳祥等多名見在孝順進剿羅斛等處
佟攀梅暫駐大塘安撫被脅難民著蔣蔚遠等仍卽督飭將餘匪
按除淨絕根株所有此次出力員弁兵勇准其擇尤保奏候朕施
恩○諭軍機大臣等王履謙奏歸德被圍東省沿河喫緊一摺捻
匪全竄豫省與山東曹單地界緊連邱聯恩潰敗之勇據王履謙
所奏在曹河途次盤獲有歸德城門關閉之語單縣董家口已有
難民紛紛逃避並聞該逆分股在南岸劉口屯聚有來曹單搶糧
之意見當河水乾涸之時東省下游南北兩岸無險可扼防河兵
勇僅止二千餘名極形單薄崇恩前奏調德州高唐等營官兵六
百五十名派緒綸帶赴金鄉縣羊山扼守曹濟咽喉調充中等營
兵三百名備防河策應此時曹單情形較前更爲喫緊雖經王履
謙派郝上庠前往曹縣堵剿亟應添撥精兵分布要隘防剿兼施

著崇恩卽於山東各營汛中星速抽調飭同郝上庠所帶兵勇探明何處緊要卽向何處截擊並飭達鏞加意嚴防至該撫前由省城調濟甯駐守之兵及咨調兗州鎮豫備兵數共六百名本爲應援各路起見見應如何布置迅速馳奏以慰廛念至潰勇難民人數眾多或恐捻匪溷迹其中並著崇恩遴委幹員於沿途要隘嚴密稽查毋稍鬆懈將此由六百里加緊諭令知之○予貴州陣亡知縣黃鳳等祭葬世職○丙午諭內閣葉名琛柏貴奏神靈顯應請加封號一摺 關帝神威助順前已疊晉崇封升爲中祀茲據該督等奏稱四年六月廣東省城各門外逆匪突起攻撲城垣仰荷 神靈默助連獲大捷省城得保無虞韶州新會三水龍川各府縣均被股匪圍撲嬰城固守亦賴 關帝顯應得以保全朕心實深寅感允宜加崇封號藉申虔敬著禮部謹擬具奏○諭軍機

大臣等向榮吉爾杭阿奏瓜鎮逆賊衝竄高資剿擊獲勝一摺前因金陵逆賊圖援鎮江竄至倉頭鎮等處諭令向榮等迅速攻剿毋任洲地各匪日久占踞茲閱該大臣等所奏鎮江賊匪於金山西面夾江中築壩直通便民河北岸洲地遂由金山渡鮎魚套至黃泥洲偷紮賊壘竄撲高資吉爾杭阿等派兵接仗雖有斬獲而黃泥洲之賊尚未驅除傷亡弁兵亦復不少未操勝算該洲去倉頭鎮三十餘里若使上下游賊匪聯絡則該逆內犯之志愈堅沿江一帶地方遼闊節節設防徒費兵力惟有扼要衝擊使賊兵不能聯爲一氣以挫兇鋒而圖制勝著向榮吉爾杭阿簡派精銳將上下游洲地各賊壘次第剿除並遏句容等處內竄之路仍嚴絕鎮江接濟勿稍鬆勁至兵力旣無可添調而招募遣勇總須來歷清楚者方可收錄勿令奸徒溷迹致有貽誤將此由六百里諭令

知之○諭駱秉章奏克復松桃銅仁兩城請飭辦善後以弭釁端
一招黔省苗匪肆擾攻陷松桃銅仁經駱秉章督派員弁兵勇不
分畛域由楚入黔先後將兩城克復辦理尙爲迅速惟首逆徐廷
杰是否就戮尙未可知而在逃餘匪亦必須接捕淨盡方能永杜
亂萌蔣蔚遠身任該省封圻責無旁貸銅仁之變旣以錢糧肇釁
總由官吏辦理不善以致頑民轉相煽惑著蔣蔚遠簡擇廉能文
武員弁酌帶兵勇前赴銅仁松桃妥爲經理一面安撫良民一面
將在逃餘匪嚴密按捕毋任漏網總期剿撫兼施肅清邊境至各
該地方員弁如有貪虐激變及臨事逃避者卽著據實參辦以儆
其餘將此由六百里諭令知之○怡良吉爾杭阿奏米國人伯駕
移文江蘇有候船卽赴上海重議條約之說英國人李泰國亦有
各國條約必求更改廣東絕之已甚各國公使萬不肯再向關說

奏入諭葉名琛體察情形妥爲查辦○予廣東陣亡巡檢胡辰祭葬世職○丁未諭內閣前年逆匪渡河北竄特命奉命大將軍惠親王參贊大臣僧格林沁統帶京營勁旅滿漢官兵及三盟蒙古官兵剋期進剿業已悉數殄滅殲擒首逆方冀各路統兵大臣愧奮激發迅速圖功俾逆氛次第掃除吾民得安衽席乃金陵逆首日久稽誅鎮江瓜州尙未克復安徽江西湖北賊蹤肆擾雖捷奏頻聞勢已漸蹙而勞師數載兵力漸疲亟應厚集精兵以期大舉著內扎薩克哲里木卓索圖昭烏達錫林郭勒烏蘭察布伊克昭各盟於所轄四十九旗內挑備驍健官兵臚壯馬匹備齊軍裝器械聽候調遣一俟秋高氣爽卽當簡派重臣統師南下加以京營勁旅滿漢重兵分道出師殄除羣醜諒茲窮寇不難一鼓蕩平各路統兵大臣仍當實力攻剿將賊匪占踞各城迅圖克復若俟大

兵南下始能奏功遲延觀望之罪責有攸歸其各懷之○諭軍機大臣等安徽擒匪竄擾河南歸德一帶見經英桂督辦三省會剿事宜兵力尙單昨已諭令直隸山西陝西各督撫調撥兵丁前往助剿著穆隆阿慶昫於察哈爾官兵內挑選精銳二千名派委得力將領帶赴張家口駐紮仍飭帶兵官勤加操練務期技藝嫻熟候旨調遣將此由四百里諭令知之○諭見在各省軍務未竣擒匪又在皖豫交界肆擾各省兵勇尙恐不敷調遣亟應先時籌撥備禦不虞著承志於所屬各旗兵內挑選勁旅二千名豫備軍裝器械選派得力將領管帶卽在該處勤加操演聽候調遣一俟奉有諭旨卽令剋日啟程將此由四百里諭令知之○以周玉麒爲內閣學士

由太常寺卿遷

○調綏遠城兵一千名吉林黑龍江兵各五百名赴山東曹州防堵竄匪○戊申和春福濟奏擒匪巢穴多在皖

境見分五大股張落刑自領一股盤踞雒河其老巢距雒河十餘里地名張家老營堅守不出餘則四出紛擾如夏白任乾李大漕等乃其東北一股我軍進攻則夏李諸匪襲我後路儻官兵少挫卽啟匪黨輕視之心而羣不逞之徒紛然以起去歲武隆額節節退守賊勢猖獗遂甚於前是其明證臣等督剿粵匪於鳳潁兩郡聲勢不聯故所派官兵統歸豫省節制惟本境堵剿實有不遑豈能奉調卽往而旣往復返疲於奔命尤恐坐誤機宜且皖省則望豫兵之來豫省又望皖兵之集彼此相待必致任賊蔓延英桂旣未能出省或但令廓清豫境竄匪防守要隘蕭碭一帶則令傳振邦興慶堵禦鳳潁各屬飭鄭魁士等迅速剿辦俟本省肅清再行過境似於剿匪事宜較有裨益上諭軍機大臣等捻匪巢穴雖在皖境而大股數萬直逼歸德豫省兵勇爲數無多待援孔亟前

因道路梗塞故諭令將鄭魁士等宿州一軍暫歸和春福濟調度
昨以歸德危急復諭和春等將鄭魁士塔思哈所帶官兵並伊興
額德昌等馬隊飭令星馳赴豫原以皖省兵勇尙多緩急輕重之
間自應統籌大局今據奏稱江皖豫三省止能各顧本境是鄭魁
士等竟不赴豫應援而以全股巨匪誘之豫省儻歸德稍有疏虞
匪蹤蔓及汴梁該提督等援救遲延豈能辭罪著和春福濟仍遵
前旨卽飭鄭魁士塔思哈督帶官兵與伊興額德昌所帶馬隊迅
速馳赴歸德聽英桂調遣儻皖境必須畱兵則於鄭魁士塔思哈
二人中酌畱一員其伊興額等馬隊必須全數派往如再延不赴
剿朕必治和春等以推諉觀望之罪懷之至所請飭催四川陝西
浙江解款已諭知各該督撫催解其山西省每月解銀五萬之處
亦諭知王慶雲酌解數月矣該提督等仍當催提江海關稅銀以

資接濟不得恃有此款任令延宕將此由六百里加緊諭令知之
○諭和春福濟奏皖省匱乏請飭催各省協濟等語所奏自係實
在情形著黃宗漢何桂清吳振械將各該省應解安徽款項儘數
湊解源源接濟俾資兵食無誤要需將此各諭令知之○諭和春
福濟奏前撥江蘇關稅銀兩據吉爾杭阿咨稱未能限定數目時
日難以應急請飭山西省每月撥銀五萬兩等語皖省待餉急迫
惟山西省撥款較多若必按月五萬恐難如數著王慶雲酌量情
形暫行籌解數月俟蘇省關稅有可接濟卽行停止將此由五百
里諭令知之○己酉諭內閣英桂奏總兵剿匪失利請分別革職
摘頂等語河南南陽鎮總兵邱聯恩河北鎮總兵崇安經該撫派
令督帶兵勇迎剿捻匪乃邱聯恩於前隊獲勝之時未能整齊列
陣輕率進兵被賊鈔襲崇安督率後隊亦未能相機策應俱屬咎

有應得邱聯恩崇安均著革職暫行畱任崇安並著摘去翎頂以觀後效儻不知愧奮卽著嚴參治罪○諭軍機大臣等英桂奏擒匪情形請三省各防本境另簡大員專駐亳州進剿一摺從前剿辦擒匪未能得手旣因在事諸臣不克和衷此時專派英桂督剿事權歸一應如何統籌大局分別緩急催兵進剿乃請簡派大員進駐亳州分投剿擊直似江皖兵勇皆非所轄希圖卸責試思封疆大吏經朕畀以督剿重任豈尙不得謂之大員耶前因擒匪直偪歸德諭令和春福濟卽調鄭魁士塔思哈所帶官兵並伊興額等馬隊赴豫應援今歸德已無匪蹤情形一變應令鄭魁士等先由何處進剿著英桂卽行飛調見在河南兵力甚單昨已諭令直隸省調兵一千二百名山西調兵一千名陝西二千名馳往歸德交英桂調遣此項官軍陸續可到著卽分撥進剿不可令其株守

歸德本日據王履謙奏南岸劉口北岸曹河民房官舍均被該匪焚燒是匪蹤已曾擾及北岸見難暫時回竄難保不去而復來設此路稍有疏虞又踏上年粵匪故轍本日已諭崇恩帶兵出省赴曹單一帶督防其傅振邦等官軍本在英桂調度之內卽飭令嚴堵蕭礪迎頭截擊不可任其深入徐州英桂居中調度總當遏賊北竄令帶兵各員由北而南一路截剿方操勝算若以重兵悉置南路不啻驅賊北來輕重失宜必致蔓延腹地此乃大局形勢不可不知者也連鎮帶兵得力人員已飭部揀發赴豫前據僧格林沁奏稱西凌阿善帶馬隊史榮椿善帶步隊人皆誠實然須用當其才使不至有所掣肘方能得力該二員見在該撫營中著察看委任永城之圍是否已解虞城夏邑等處有無賊蹤此次摺內均未敘及英榮等因該匪北竄劉家口等處省城亟應守禦奏請派

兵防剿今劉口之匪雖已南竄省城重地仍應嚴爲設防著傳諭該藩司等妥爲布置毋稍大意將此由六百里加緊諭令知之○諭皖省捻匪分股竄擾勢極剽悍山東曹單等縣與河南虞城江蘇徐州等處在在接壤該匪竄至劉口分踞上下河灘董口南岸亦時有騎馬匪徒往來自係意圖北竄且恐其窺伺豐沛圖犯兗濟山東省南界情形實爲喫重前據崇恩奏稱派委郝上庠等抽調兵勇於豫東交界相機堵禦惟兵力較單且曹單災民甚多亦恐郝上庠難於兼顧著崇恩調撥該省精兵親帶出省前赴曹單一帶督同該護鎮等將應守要隘派撥兵勇嚴密布置一面撫恤災民毋令勾結爲患前調德州等處官兵自己到防崇恩到後兵力較厚儘捻匪北竄即可相機進剿北路防堵尤關緊要設有疏虞朕惟崇恩是問該撫接奉此旨著將啟程日期先行馳報毋許

遲延貽誤再據王履謙奏稱擒匪在劉口屯聚時忽有荷澤人馬振清弟兄率領千餘人在單縣東關滋擾假稱奉英桂諭令募勇三千前往歸德旋即四散等語匪徒滋擾每恃內應馬振清等是否係該處土匪圖與擒匪句結著崇恩密速查訪嚴拏懲辦以清內患將此由六百里加緊諭令知之○戶部奏遵覈酌增各直省文武官員養廉福建業照減成原案議增無容再議此外各省擬即自本年夏季起文職一二品酌給七成三四品酌給八成五品以下及七品正印官與武職三品以上酌給九成其餘文職六七品以下佐貳雜職武職四品以下以及軍營帶兵效力各員均照原額支給得旨所有各直省官員養廉自本年夏季起文職一二品三四品五品以下及七品之正印官武職三品以上均著照該部所議酌增成數支給俾資辦公以示體恤○辛亥諭軍機大臣

等昨有旨令崇恩調撥精兵親自督帶出省赴曹單一帶相機進剿本日據該撫奏董劉等口已無賊蹤二縣兵勇已有三千餘名嶧滕防兵單弱見擬添兵扼堵韓莊等語捻匪分踞上下河灘本圖北竄並在劉口曹河焚毀民房官舍因聞達鋪郝上庠等帶兵趕往暫時退竄難保不去而復來雖單縣民團整齊亦必有大員督防方能鎮定人心况曹單兵單續調赴防之濟甯防兵僅止三百名不足以資堵禦且據英桂前奏有分股由劉口竄赴碭山之語並思窺伺豐沛圖犯兗濟崇恩惟有親督官兵出省赴曹單等處探明防剿兼可策應嶧滕見在兗曹等處雖暫時安謐而賊情變幻靡常兵進則賊退兵止則賊來必待偵探有警方議徵調恐緩不濟急徒誤事機著崇恩迅速帶兵前進與河南徐宿各路兵勇聯絡聲勢合力剿擊儘觀望不前致令匪蹤北竄恐該撫難當

此重咎也將此由五百里諭令知之○諭邵燦奏馳抵清江督辦防剿並籌接濟一摺前據英桂奏擒匪在歸德分兩股退去一股竄至劉家口復東竄碭山永城一帶一股分路回竄潁亳等處此時歸德已無賊蹤而蕭碭一帶均有竄匪傳振邦等自應由近及遠節節進剿固不可自撤藩籬亦未可以防堵爲名一味株守著邵燦飭令該署鎮等先行剿除蕭碭賊匪毋任盤踞並與皖豫官軍聲勢聯絡互相援應則此烏合之眾不難次第廓清見在徐州一路既歸邵燦調度著卽悉心體察情形督飭相機前進軍情變幻靡常務在先其所急所需軍餉卽設法源源接濟毋令匱乏將此由五百里諭令知之○以山東紳團守禦出力予在籍侍郎車克慎前任巡撫傅繩勛按察使孫毓汶議敘賞己革巡撫馮德馨六品頂帶○壬子諭內閣恆春奏勦辦劫獄戕官匪徒完竣一摺

雲南彌勒縣道人朱姓糾合夥黨多人突入縣城將該縣知縣陳恩殺戕害並其家人丁役數十人開放監犯搶掠銀兩當經恆春派委護鹽法道鄧爾恆署副將陳得功統帶官兵前往會同迤東道潘楷查辦並經署廣西直隸州彭克儼汎弁馬中驥等生擒賊首吳美朱順等二十餘名已革守備施嘉瑞緝獲賊首趙璞等三十餘名署阿迷州官昕督同眼綫擊獲逆首朱憲卽鍾朝順賊首王贊汶地方均已肅清彌勒縣典史江吉鈞於印官被戕監犯被劫毫無防範實屬無能著卽革職迤東道潘楷署廣西直隸州彭克儼於所屬匪眾滋事咎有應得惟帶兵督辦殲擒首逆功過尙足相抵潘楷彭克儼均著免其議處○諭軍機大臣等邵燦奏徐州情形喫緊請添撥兵力扼守一摺前此英桂奏請三省各防本境朕因歸德已無賊蹤諭令該撫飛調鄭魁士等探明何處喫緊

卽先由何處進剿茲據邵燦奏稱擒匪由歸德分投東擾小陽集
碭山西路賊已偏城其由夏邑太平集竄入者距城亦僅三十餘
里且夏白任乾兩股並在宿州之童町孫町一帶聲言欲往徐州
報復該處爲北路屏蔽捍禦宜嚴傳振邦興慶駐紮蘇家集等處
堵禦兵勇極單勢難兼顧碭山著英桂傳諭鄭魁士等分兵前赴
碭山應援毋許遲延並飭傳振邦等以剿爲堵不得藉詞保守徐
州任令蔓延將此由六百里加緊諭令知之○命署江甯將軍福
興幫辦江南軍務○命炳綱來京以王成璐署貴州布政使出雲南鹽
署○子雲南被戕知縣璩恩綬江南陣亡知縣松壽祭葬世職

法道

○癸丑諭軍機大臣等官文奏師久無功自請從重治罪等語前

因德安武漢等處先後被賊蹂躪楊需西凌阿剿辦無功特授官
文以督師重任該大臣總統師干自當隨機應變出奇制勝乃據

以調度無方自請治罪當此事機喫緊之時豈容置身事外朕於各路統兵大臣有功者不吝爵賞有罪者亦自有權衡該大臣惟當激勵士氣設法圍攻以副委任豈得以請罪虛文爲塞責耶見在興國大冶一帶賊援踵至據稱楊載福水軍僅能遏賊上游荆襄水路紛歧宜防竄突卽當杜絕外援力圖克復漢陽兼顧荊襄門戶並與胡林翼等謀勇兼施聲勢聯絡以期一鼓蕩平毋得觀望畏難致挫三軍銳氣將此由五百里諭令知之○官文奏二月初五日副將顏朝斌督兵由鸚鵡洲一帶進剿直偪賊卡該逆率眾圍撲我軍奮力迎擊斃賊多名當將賊卡焚毀該逆礮船揚帆上援適值楊載福督船出隊將賊船圍擊賊勢不支轉舵逃奔我軍大獲勝仗奪獲大挖呂船一隻燒毀大烏船二隻奪獲大銅礮十七尊生擒老賊二十餘名燒斃溺斃者無數是日署按察使李

孟羣副將王國才分左右隊於漢陽西門外誘戰賊見我軍列陣直前攻撲李孟羣揮兵迎擊千總劉德榮身受四傷猶手刃悍賊一名軍功范潮蘭又往五顯廟誘賊出戰賊出二百餘人俟其撲近擊之李保邦亦自伯牙臺鈔擊而至又斃賊多名李孟羣礮船燒毀賊船三隻並將五顯廟賊卡焚毀初六日李孟羣王國才於漢陽西門橋誘敵賊出二千餘眾我軍佯退該逆追至七里廟訥依琿阿馬隊首先鈔擊殺傷多名賊匪奔潰惟時漢陽南門外顏朝斌楊載福等同時會攻百計誘之該逆江面礮船因前日之敗不敢復出岸上賊眾出拒我軍旋敗退入卡已革總兵訥欽等在江邊埋伏潛出一軍將該逆五顯廟卡牆更樓一併轟倒該逆大股由龜山趨至援應月湖內賊船亦開礮抵禦復有股匪由梅子山衝出我軍先已節節埋伏該逆猝不及防驚奔回卡我軍復礮

斃湖內賊匪十餘名外江賊船聞砲聲趨援亦被我軍擊斃無數
初八日李孟羣等分途進攻該逆堅守城壘直至午後於西門出
賊四千餘眾分路來撲勢極勇猛我軍嚴陣以待王國才等直搗
中路該逆首尾不顧勢卽披靡被我兵殺斃數百餘匪敗遁十二
日夜南岸賊船六十餘隻潮流而上李光榮等分坐划船迎擊焚
燒賊船十餘隻斃賊多名餘船乘風而遁查該逆疊次受創以堅
守爲得計我軍屢抵卡下拔其鹿角焚其木柵均被卡內槍礮所
阻傷亡甚多賊卡破毀隨修未能卽平焦灼實深見仍咨會胡林
翼分撥礮船陸隊先行截賊青山援路一面督率南北各軍更番
攻剿庶得乘機攻克以期一戰成功兩城速復報聞○乙卯諭內
閣英桂奏團勇擊散捻匪永城解圍一摺捻匪前偏歸德府城因
見守禦尙嚴遂分股回竄皖境其圍永城之匪日久未解先經英

桂蘭撥兵勇援剿鄉團聞官兵將至糾集五六千人裹糧助剿
永城縣知縣劉鴻昌守備張邦瑞同官紳人等從城內殺出與團
勇內外夾攻生擒匪首劉五等五名奪獲器械無算城圍立解著
英桂嚴飭在事將弁將本境餘匪悉力按捕並一面飛咨鄭魁士
迅剿潁亳一帶直搗賊巢毋使滋蔓○諭軍機大臣等英桂奏永
城解圍並見在布置情形一摺擒匪大股回竄皖境歸德情形較
緩永城又已解圍徐宿兩軍自可毋庸赴豫所有皖境擒匪著責
成鄭魁士等實力剿除其永蕭交界之李大漕一股業已敗回若
碭山亦無賊蹤則傳振邦與慶等卽應由江皖毗連處所進兵會
剿不可徒防本境稍存畛域之見總以嚴扼北犯不使蹂躪完善
之區爲要見在賊情戀其巢穴正可驅令回巢然後聚而殲旃庶
不至匪蹤四出防剿難施英桂此次奏報布置情形均尙妥協徐

宗幹於山東情形素爲熟悉該撫既令駐紮劉家口即可激勵鄉團以資扼守昨已有旨嚴催崇恩帶兵赴曹單一帶嚴密布置著英桂傳諭徐宗幹與崇恩聯絡聲勢並將曹單一帶情形飛報英桂隨時具奏歸德附近小股匪徒卽責成邱聯恩迅速剿辦一俟內患肅清卽行進兵皖境剿賊歸巢其西通開封之路卽責成崇安嚴扼毋許鬆懈見調之直隸兵一千二百名山西兵一千名均已啟程不日卽可到豫其陝西兵二千名諒亦陸續進發英桂務當飭令由北路一帶節節進剿不可株守歸德至傳振邦以防守本境爲詞鄭魁士又稱進剿懷遠是否遷延觀望抑避邵煉和春等調度幸此時歸德可緩救援若仍前危急豈不貽誤大局著邵煉和春福濟查明具奏英桂既督剿三省捻匪此後道路不至梗阻所有蘇皖各鎮將仍應聽英桂調度以期事權歸一毋致歧誤

將此由六百里加緊諭知邵燦和春福濟英桂並傳諭徐宗幹知之○丙辰諭內閣承志等奏查明金州地震情形一摺奉天金州地方於上年十一月十二日開連次地震以致城垣垛口有坍塌段落並震倒旗民住屋多間雖據奏稱均係散處各村屯一二間至十數間不等並未大有損傷朕心實深矜憐所有鑲黃等四旗界內震倒旗民各戶住房五百六十餘間加恩著照例給與修費仍著該署將軍等飭令該旗民地方官妥爲安置毋令遷徙失所惟該州地震既稱於去歲十一月初三日起至十二月十二日止何以遲遲至今始行入奏殊屬不知緩急此後有無復震並毗連處所有無震壓情形之處著卽隨時奏聞以慰廑念○諭軍機大臣等滿慶奏遵查廓番情形請暫緩統師前進一摺前因廓番投遞稟稟情似悔罪曾諭令赫特賀滿慶查探確情妥爲駕馭茲據

滿慶奏稱廓番因天朝命將出師中懷恐懼有罷兵求和之意所調前藏土兵已經赫特賀飭令截留未便愈張聲勢轉起該夷疑慮且前藏值達賴喇嘛圓寂事務較繁亦未能遽置前往等語自係實在情形滿慶著准其暫緩馳赴後藏惟夷情反覆無常仍著赫特賀確加偵探如該夷果知畏懼願將占踞各地方悉行退出並遵前次剖斷自應相機辦理以息兵端儻該夷前遞稟函不過爲緩兵之計春融以後復肆猖獗則仍應懾以聲威使知震懾以期就我範圍一切操縱機宜並著赫特賀與滿慶函商斟酌熟籌妥辦毋得稍涉疏率滿慶另摺奏藏臺防兵請就地招募等語藏臺防兵募補章程著准照所擬各條暫行變通辦理俟軍務告竣後或作爲定例或仍照舊章之處由駐藏大臣具奏請旨將此各諭令知之○向榮奏該逆竄踞倉頭顧家壩內犯堪虞臣檄令鄧

紹良馳抵六里店會同余萬清妥籌布置迅速進兵該逆連日由山僻小路竄越焚掠俱經遊巡兵勇分投擊退二十六日有賊大股至嚴巷口姚岡築壘鄧紹良會同余萬清派隊分路攻撲逆眾盡擁拒戰遊擊李定太督軍奮剿鄧紹良與余萬清親督大隊左右鈔攻轟斃賊匪無算連奪大黃旗多桿賊勢不支官軍移營進逼二十七日該逆五六千人分路迎拒鄧紹良馳馬督戰被賊礮傷鞍膊李定太亦被槍傷左頰余萬清催兵奮擊陣斬悍賊多名斃賊數百餘人該逆復分股窺犯下蜀街圖襲營盤被虎嵩林伏兵擊敗二十八日余萬清會兵夾剿拏斬多名將賊屯糧房屋燒毀三十餘所兵勇進紮和家灣逼攻嚴巷該逆分路拒戰鄧紹良親督指揮令千總徐剛等從山左將賊要擊先後斃賊二百餘人李定太衝入賊隊連斬黃衣賊二名餘逆大潰奔逃二月初一二

等日官軍會攻姚岡顧家壩賊壘斬獲甚多盡將壘外鹿角椿鐵
夾毀並焚其屯糧之草田二壘餘逆併入劉家莊木瓜村兩壘死
守初五日夜復來襲便民河被伏兵痛剿截回該逆以下蜀街六
店剿截嚴密有復向上游由三汊河內犯蘇常之語初八九等
日張國棟會同德安秦如虎由三汊河龍潭口進攻賊壘殺賊二
百餘人另股竄至英隆洲屯踞經余萬清田宗揚疊次要擊斬賊
五十餘名偪溺河港死者數十名臣查賊由英隆洲竄踞橋頭既
鈔出下蜀街之前內犯旁竄在在堪虞臣先調總兵明安泰至句
容縣堵紮一切城守事宜均已布置周妥見在丹陽緊要仍令該
總兵馳往設防惟兵力甚單臣軍除調出各路外存營不及四千
人該逆大股出竄以來我軍連月苦戰雖斬擒逆匪不下六七千
眾而我兵受傷亦一千餘人探聞上游賊援又有萬餘踵至欲由

石埠橋東流等處衝竄是賊勢日增日眾我兵愈分愈少四顧躊

躇左支右絀因函商督

臣

怡良於江蘇籌兵二千名更替扼紮以

便抽撥兵力併圖攻剿無如急切不能趕到惟有飭催鄧紹良會

同余萬清相機進攻一面令德安張國樑直擣倉頭使賊首尾牽

綴不能兼顧十二至十五等日張國樑等兵進攻倉頭該處賊巢

六座前後相倚我兵搶撲前壘賊從後壘併夥抵拒又有顧家壩

賊眾來援我軍鼓勇攻打轟斃守塚多人立破前壘二座該逆於

十二日夜自焚賊巢全股竄赴炭渚其衝犯龍潭之賊經秦如虎

等過河迎剿殺斃賊匪二百餘人乘勝進攻橋頭並躍看紮營地

勢見擬移營偪攻分屯東西堰一帶總期扼住內犯迅將竹裏廟

橋頭炭渚之賊併力掃蕩

臣

惟有殫竭血忱妥爲籌策與吉爾杭

阿和衷商辦督飭該提督等嚴密堵剿力扼要衝以冀仰紓宸

屢上諭該逆自占踞倉頭嚴巷後雖經官軍連日痛剿而賊黨愈眾復由沿江炭渚橋頭一帶步步築壘綿亘洲地至百餘里之遠斷非隨處設防所能堵截覽其所奏接仗情形將士皆能用命而洲地港汊紛歧必須水路夾擊向榮所調怡良兵二千名卽著飛提赴營派撥助剿本日復諭知何桂清於浙江防兵內酌量籌撥一千或數百名卽可飭交鄧紹良等分投堵擊總以力掃賊壘使沿江之賊不能與瓜鎮句連庶可杜其內犯至黃泥洲賊匪既自瓜州繞越竄出瓜州賊營必已空虛托明阿等卽不能杜其由江邊竄越之路豈不能乘賊空虛力圖克復似此因循坐視殊屬不知大局著懷遵前旨迅將瓜州賊巢剋日掃除以分南岸之勢無得徒事遷延自干咎戾將此由六百里加緊各諭令知之○諭逆匪自竄踞倉頭顧家壩等處屢圖內犯蘇常漸與下游瓜鎮竄

出股匪繞越通聯近復探聞上游賊援又有萬餘踵至欲由石埠橋東流等處衝竄而向榮一軍除調往各路外存營兵不過四千名雖經向榮會商怡良於蘇省籌兵二千更替扼紮仍恐兵力不敷賊勢日增日眾我兵愈分愈少覽所奏情形實屬萬分緊急蘇常爲浙省門戶設有疏虞何堪設想著何桂清卽於該省存兵及各路防兵內籌撥勁旅千名選派得力將弁管帶迅速馳赴向榮軍營聽候調遣如該省之兵實係無可分撥亦務須酌量緩急通籌大局調撥數百名前往以資攻剿而助聲援將此由六百里加緊諭令知之○丁巳諭內閣蔣蔚遠孝順奏勦辦匪徒克復府城一摺貴州銅仁匪首徐廷杰連陷四府一廳疊經官兵勦收復思南松桃思州該匪尙在石阡及毛家寨等處屯聚候補知府王敬烈署餘慶縣知縣彭瀾帶兵進剿署知府黃培杰約齊團練奮

力迎擊追抵石阡城下官兵踊躍齊上當將府城克復毛家寨匪黨望風而潰賊巢盡行焚毀惟時湖南兵勇越境會剿業已克復銅仁餘黨潰散著蔣爵遠等嚴飭各員弁迅速接剿務將匪首徐廷杰毛大先等悉數擒獲以淨根株署石阡府知府黃培杰署石阡營都司陳完元均著開復革職處分並免其查辦遊擊鄂清於楚兵協剿銅仁時帶勇打仗七次隨同克復尙屬愧憤著免其查辦○向榮奏蕪湖石壘餘賊經江長貴督兵堵剿布置嚴密正月二十七等日東梁山竄賊至四合山築壘撲營江長貴親統大隊鈔截斬首數十級總兵吳全美帶紅單挖督等船於正月十四日駛近兩梁山山坳賊船數十隻亦揚帆前來抗拒我軍開砲迎剿立沈賊船數隻焚毀賊糧船十餘隻二月初一日吳全美揮船下駛將至四合洲紅單船忽然間淺吳全美卽抽換弋磯挖督一船

於初四日乘風直下攻至兩梁山沿江掃蕩適副將李德麟分派紅單七船及快蟹三隻隨同上剿大通江面初七日風色甚順吳全美督船攻擊南北兩岸賊壘風息收隊復分撥水勇三百名在江邊紮營助剿聯絡水陸聲勢見在江鎮情形喫重若將上游江面扼斷賊勢自孤廣東續調紅單等船二十七隻尙無到江信息臣擬俟該船到江卽令調赴上游與吳全美等會同剿洗以期早靖長江報聞○是月給河南商邱等五縣被擾貧民一月口糧